

Karaloukta nütüma Pablo namüin na Chajanakana ROMA

**Nüsaküin Pablo na anoujashiikana
chakana Roma**

1 ¹Taya, wane chi nüchepchiakai Cristo Jesús, Pablokai anülia, wane chi Aluwataaushikai aneekajalaakai nütüma Maleiwa, tashajüin joolu'u jümüin jia anoujashii nünain Jesucristo kepiakana sulu'u tü pueulokat Roma. E'itaanüshi taya nütüma süpüla taküjainjachin sümüin wayuu tü nüchiki anasükat aapünakat wamüin nütüma Maleiwa. ²Saashin tü nashajakat na nünüikimaajanakana Maleiwa paala sümaiwa sulu'u tü karaloukta nüchikimaajatkat Maleiwa, pansaasü nünüiki sünain nu'tte'erüinjatüin wayuu nukajee chi Nüchonkai, chi Wasenyotsekai Jesucristo. ³Watüjaa aa'uchi Jesús sünain wayuuin nia, saa'u niain nuu'uliwo'uin David, chi sülaülashikai mma paala sümaiwa. ⁴Maainjalasai Jesús. Je watüjaa aa'uchi sünain Nüchoin Maleiwa chi Pülashikai ma'i, süka süso'iraa'in naa'in nütüma süchikijee ouktaa. ⁵Saa'ujee anamiain Cristo tamüin, nüneeküin taya süpüla ta'yataainjachin

nümüin je süpüla kojütüinjachin nia tatüma. E'itaanüshi taya süpüla taküjainjatüin tü nüchikikat sainküin mma sümüin tü wayuukolüirua nnojotkat judfoin, tü “gentilekalüirua” maa aka jiakana, süpüla sünoujainjatüin nünain je süpüla soonooinjatüin sümaa nünüiki. ⁶⁻⁷Tasaküin joolu'u jia chakana Roma, jia aishiikana nüpüla Maleiwa, jia aneekünüshiikana nütüma süpüla nüpüshinjanain Jesucristo. Achuntüshi taya nümüin chi Washikai Maleiwa je nümüin chi Senyotkai Jesucristo süpüla nee'iyatüin na'anasia waneepia jümüin je süpüla naapüinjanain wane ana jümüin.

**Kee'iresü naa'in Pablo
o'unaa Romamüin**

⁸Je palajana, süka yootüin süchiki tü jünoulakat sainküin mmakat süpüshua, taapüin analu'ut nümüin Maleiwa saa'u tü kasa anasü naa'inrakat Jesucristo jümüin jiakana jüpüshua. ⁹⁻¹⁰Nia Maleiwa ta'yataaka amüin süka süpüshua taa'in sünain taküjain nüchiki chi Nüchonkai O'tte'erüikai. Nia atüjaaka taa'u sünain tachuntüin

nümüin waneepia joo'opünaa so'uka'i je sa'wai. Je achuntüshi taya nümüin süpüla o'unaa jünainmüin cha'aya Romamüin, müleka nücheküle shia tapüleerua.

¹¹Cheeshi taya jümaa süpüla taküjainjatüin jümüin wane pütchi anasü aapünakat nütüma chi Naa'inkai Maleiwa tamüin süpüla katsüinjatüin jaa'in sütüma. ¹²Kee'ireesü taa'in wakaaliijiraain wayakana wapüshua sünain achecheraa waa'in sükajee tü wanoulakat. Wanaa sümaa katsüin jaa'in tatüma saa'u jirüin tü tanoulakat, katsüinjeerü taa'in jütümaya saa'u te'rüin tü jünoulakat. ¹³Jütüjaa aa'uchi taya, tawalayuwaa, sünain taküjain nüchiki chi O'tte'erüikai sümüin wayuu gentile sainküin mma, je takaaliijain naya süpüla anoujaa nünain Cristo. Aka'aya na manoujainsaliikana chakana Roma, kee'ireesü taa'in joolu'u takaaliijeein naya süpüla nanoujain nünain. Wainmatuaichi taya achuntüin shii'iree to'uneein jünainmüin. Isasü tachiki o'unaa. Müshi aka ta'alijinnakai aa'in.

¹⁴E'itaanüshi taya süpüla aküjaa nüchiki chi O'tte'erüikai sainküin mmakat süpüshua, sümüin wayuu eekai kache'eiin pütchi griego je sümüin wayuu eekai mache'eiin griego, sümüin wayuu eekai sütüjain karaloukta je sümüin eekai matüjain. ¹⁵Je sükajee tia, yapashi taya süpüla taküjainjachin nüchiki sümüin tü wayuukolüirua chakat Roma.

¹⁶Nnojoishi taya japülin sünain aküjaa nüchiki chi O'tte'erüikai sümüin wayuu. Chi wayuu eekai naapüin tü nüchikikat Cristo sümaa nünoujain nünain, o'tte'enneechi nia nütüma chi Maleiwa Pülashikai.

Na wayuu aküjünakana amüin tü nüchikikat palajana, naya na judfokana. Je na judfo eekana nanoujain nünain, o'tte'ennüshii naya. Aka'aya na gentilekana, mayaasüje maküjuuin nüchiki namüin paala, aküjünüitpa namüin maa'ulu yaa süpüla no'tte'ennajanain na eekana nanoujain nünain. ¹⁷Je sütüma tü nüchikikat chi O'tte'erüikai, wayaawatüin saa'u sünain anajiraainapain waya nümaa Maleiwa sünainjee tü wanoulakat. Naa'inrüin chi Maleiwakai tü kasa anasükat wamüin saa'ujee wanoujain nünain Jesucristo. Shia tü ashajünakat paala sulu'u tü karaloukta nüchikimaajatkat chi Maleiwakai, sünain müin mayaa: “Chi wayuu eekai nünoujain nünain Maleiwa, anaawashi nümaa kataiwa'aya no'u. Je ouktapa nia, ayatshi anaawain nümaa”.

Nü'ürüla Maleiwa sünain wayuu süpüshua

¹⁸Süka masütaajuin wayuu manoujainsat sünain kaainjalaa, shiyouktüin tü shiimüin nüchikikat chi Maleiwa iipünaajachikai. Je sükajee tia, jashichishi ma'i nia namüin. Süsaleena naya nütüma süka mojutüin nia natüma je süka ayatüin naya sünain kaainjalaa. ¹⁹Tü shiimüin nüchikikat chi Maleiwakai, nnojotsü nunujulüin suulia tü wayuukolüirua. Ja'yasü ma'i sümüin wayuu süpüshua nütüma ²⁰sünain niain Maleiwain je sünain niain pülashin, sükajee tü kasa nükumajakat paala sümaiwa. Nnojotsü wayuu matüjaainkat naa'u Maleiwa, süka shi'rüin wayuu süpüshua tü kasa nükumajakat. Je

sükajee tia, nnojotsü jamüinjatüin nanüiki nümüin.

²¹ Soo'opünaa natüjaain naa'u chi Maleiwakai, nnojoshi kojütüin natüma sümaa nnojoliün naapiün analu'ut nümüin. “Shiimüinshi süinain piain Maleiwain”, nnojoshii müin nümüin. Nnojotsü nayaawatüin aa'u tü shiimüinkat. Je tü jülüjakat naa'in, nnojotsü kasain anain apüla, süka nayouktüin tü shiimüinkat. ²² Ja'itaina kekiishiin naashin, maa'in aa'inchii ne'e naya. ²³ Süinain nnojolin na'waajüin chi Maleiwakai Matüjainsaikai ouktaa, shia na'waajaka ne'e shiyaakua kasa wainma, tü namaleiwasekalüirua naajüin. Na'waajüin shiyaakua wayuu, tü ouktajatkat so'u wane ka'i. Je na'waajüin shiyaakua wuchii, shiyaakua mürüt, oo'ulaka shiyaakua tü kasa lemtüsükat mmolu'u.

²⁴ Je saa'ujee nnojolin kasajachin chi Maleiwakai namüin, ayüülajünüshii naya nütüma süpüla naa'inrüinjatüin tü kasa mojusü kee'ireekat ma'i naa'in. Mojulaajiraashii naya napüshua. Naa'inrüin tü kasa japüikat atüma wayuu, maa aka a'luwajirawaa akuaippaa sümaa wayuu jierü otta wane jierü nümaa wane toolo. ²⁵ Nayouktüitpa tü shiimüinkat nüchikikat chi Maleiwakai süpüla shiain joolu'u nanoujainjatüin tü alawaakat. Chi Maleiwakai akumajakai kasa süpüshua, shiimüin süinain niainjachin wa'waajüin süpüla ka'i süpüshua. Alu'usa nayakana, nnojoshi niain na'waajüin. Shia na'waajaka ne'e tü kasa nukumajalakat. ²⁶ Je süka nayouktüitpain tü shiimüinkat, ayüülajünüshii naya nütüma

Maleiwa süpüla naa'inrüinjatüin tü mojusü kee'ireekat ma'i naa'in. Oo'ulaashii na jieyuukana suulia atunkirawaa nümaa na'wayuuse süpüla nama'üjaainjanain namaa eekai jieyuujiraain wanaa namaa. ²⁷ Mataaja'a na toologyuukana süinain noo'ulaain suulia atunkirawaa sümaa na'wayuuse, süka kee'ireein naa'in tü mojusükat namaa eekai toolojiraain wanaa namaa. Ama'üjiraashii na toologyuukana. Je süsalashii naya tia nütüma Maleiwa.

²⁸ Ja'itaina natüjaain aa'u chi Maleiwakai, motüsü naa'in tü nayaawatakat aa'u nünainjee, süka nnojoliün kasain saapiün namüin naajüin. Je sükajee tia, ayüülajünüshii naya nütüma süpüla ne'iküinjatüin naa'in süinain aa'inraa tü mojusü jülüjakat waneepia naa'in. ²⁹ Je saa'ujee tia, alana'aleesia saainjala wayuu maa'ulu yaa, sümaa mojulaain ma'i naya, maa aka kachiiruaa aa'in washirüü, je maa aka jülüjaa aa'in tü mojusükat waneepia. Achunjasü naa'in shii'iree o'utaa saa'in wayuu. Ashe'ejiraweeshii naya. Aküjashii naya alawaa. Kanainstü naa'in wayuu. Eperulajaashii naya. ³⁰ Mojusü nanüiki sujuuna wayuu. A'ürülaashii ma'i nünain Maleiwa. E'rülii ma'i wayümüin naya sümüin wayuu. A'waataashii ma'i naya sulu'u nakuaiippa sümaa pülain naa'in suulia wayuu. Jülüjasi naa'in waneepia tü kasa mojusü naa'inrüinjatkat. Nayouktüin süchiawaa nei je nüchiawaa nashi. ³¹ Nnojotsü mojuin naa'in saaliijee naainjala. Nnojotsü pansaain nanüiki. Nnojotsü namüliajüin wayuu eekai müliain ja'itasü nüpüshin naya. ³² Je ja'itasü

natüjaain aa'u tü nümakat chi Maleiwakai sünain: “Kasalajaneerü sümüin wayuu süpüshua eekai saa'inrüin kasa eekai müin aka tia sümaa su'utinnaleein aa'in”, sünain nümüin sümüin wayuu, ayatshi'iya naya sünain kaainjalaa. Je nanüiki namüin na wayuu aa'inrakana kasa mojusü wanaa namaa: “Anasü tü jaa'inrakat”, müshii naya namüin.

**Kasalajaneerü sümüin
saainjala wayuu süpüshua**

nütüma Maleiwa

2 ¹Eesüja'a süpüla jümüin tamüin: “Tü wayuukolüirua püküjakat achiki wamüin, shiimüin sünain kaainjaralii naya. Acheküsüja'a kasalajanainjatüin namüin naainjala. Otta wayakana, nnojoiishii müin aka nayakana”. Tamüshii paala jia: Wanaawashii jia namaa na wayuu jiyoujakana, süka jaa'inrüinya ne'e tü kasa mojusü naa'inrakat. Sükajee tia, kasalajaneerü jümüin jiakanaya. ²Watüjaa aa'uchi chi Maleiwakai sünain lotüin nukuaippa süpüla kasalajanainjatüin nütüma saainjala tü wayuu aa'inrakat kasa müin aka tia. ³Müsüja'a eera jaa'in jüle'eru'u: “Kaainjaralii nala, otta wayakana, nnojoliishii müin aka naa'in. ¿Kasakaja eera kasalajaneerüin wamüin nütüma Maleiwa?”. Tamüshii paala jia: Shiimüin sünain eein kasa kasalajaneetkat jümüin, süka jaa'inrüin tü kasa mojusü naa'inrakat nayakana. ⁴Müshiija'a eera jia te'ipajee: “Nnojoleechi aashichijaain chi Maleiwakai wamüin maalü saaliijee waainjala, je nnojoleena süsalain waya nütüma, süka anamiain ma'i nia

sümüin wayuu”. Tamüshii paala jia: E'rülüü wayümüin ma'i jia nümüin Maleiwa. ¿Jamüshii jia nnojoliika'a jiyaawatüin saa'u sünain anamiain nia jümüin shii'iree jiyaawajaainjanain suulia jaainjala?

⁵Manoujüinyeesalii jia sünain nnojoliün jaapaain tü nümakat chi Maleiwakai süpüla jükatalaain suulia jaainjala. Sükajee tia, müle'oleejeeria ma'i naashichin chi Maleiwakai jümüin, süka lotüin nukuaippa süpüla süsaleenain jia jaainjala nütüma so'uweena tü ka'i kasalajaneetkat o'u saainjala wayuu nütüma. ⁶Je so'u ka'ikat tia, süsaleena jia jaainjala sünainjee tü jaa'inrakat kataiwa'aya jo'u. ⁷Eesü wayuu eekai süchecherüin saa'in sünain aa'inraa tü anasükat sümüin wayuu. Kataiwa'aya no'u, a'waajünüshi chi Maleiwakai nütüma sümaa kojutüin nia nütüma, süka kee'ireein ma'i naa'in kateein no'u waneepia nümaa süchikijee ouktaa. So'u ka'ikat tia, aapümeerü nümüin nümawaa Maleiwa süpüla ka'ikat süpüshua. ⁸Akaajasa chi wayuu ayouktakai tü shiimüinkat sümaa naa'inrüin waneepia tü mojusükat kataiwa'aya no'u, süka kee'ireein naa'in tü anasükat nüpüla niakai ne'e nümüiwa suulia wayuu, ütteerü ma'i naa'in chi Maleiwakai noo'omüin so'u ka'ikat tia. Süsaleechi nia naainjala nütüma. ⁹Müle'ojeerü ma'i tü müliaa ne'reetkat na wayuu aa'inrakana tü mojusükat kataiwa'aya no'u. Maa aka judfo otta gentile, ne'reerü müliaakat so'u ka'ikat tia. ¹⁰Otta napüshua na wayuu aa'inrakana tü anasükat sümüin wayuu kataiwa'aya no'u, kojuteena naya nütüma Maleiwa so'u ka'ikat tia, je nnojoleena mmolüin naya neema. Maa aka judfo otta gentile, kojuteena nütüma süka

¹¹matüjain nia kachekalaawa'ataa wayuu.

¹²Na gentilekana, mayaainje nnojolüin nama'anain tü nüshajakat Moisés, amílouijeenia ne'e waneepia naya saaliijee naainjala. Otta na judíokana kama'anakana tü nüshajakat Moisés, kasalajaneerü namüin naainjala nütüma Maleiwa süka moonooín naya sümaa tü nümakat. ¹³Na wayuu eekai naapüin ne'e tü nümakat Moisés, nnojoliishii anajiraain nümaa chi Maleiwakai sükajee tia. Alu'ujasa müleka naa'inrüle tü nuluwataakat anain Maleiwa, anajiraweena nümaa. ¹⁴⁻¹⁵Eesü wayuu gentile eekai naa'inrüin süka naa'in namüüwa tü nuluwataakat anain Maleiwa, mayaasüje nnojolüin aapünüin namüin tü nüshajakat Moisés. Akaaliijünüshii naya nütüma Maleiwa sünnain atüjawaa saa'u tü kasa anasükat süpüla naa'inrüin oo'ulaka tü mojusükat süpüla nayouktüinjatüin. Wanaa sümaa naa'inrüin tü kasa anasükat, nayaawata aa'u sünnain anain shia no'ulu'u Maleiwa. Je müleka naa'inrüle tü mojusükat, nayaawata aa'u sünnain mojuin shia. ¹⁶Saashin tü nüchikikat chi O'tte'erüikai, tü taküjakat jümüin, eejeechi Jesucristo nümaa chi Maleiwakai so'uweena tü ka'i kasalajaneetkat o'u sümüin saainjala wayuu süpüshua nütüma. Mayaasüje nnojolüin atüjaanüin aa'u saainjala wane wayuu, atüjaaneerü aa'u kasalajanapa sümüin so'u ka'ikak tia.

Tü na'waataakat alu'u na judíokana

¹⁷Müshii jia sünnain ju'waataain sulu'u jünüiki: “Wayuu judío waya, waya'aya nüpüshika Maleiwa, je

kojutsü watüma süpüshua tü nüshajanainkat Moisés. ¹⁸Sünnainjee we'ikünüin sünnain tü nüshajakat, wayaawata aa'u tü nüchekakat Maleiwa wapüleerua, tü kasa anasükat süpüla waa'inrüin otta tü kasa mojusü nnojolüinjatkat waa'inrüin. ¹⁹Waya ekirajaka wayuu sünnain tü shiimüinkat, je wakaaliijain na eekana nnojoliin natüjaain naa'u Maleiwa. ²⁰Süka wayain aapünüin amüin tü nüshajakat Moisés, watüjaa aa'ut kasa süpüshua süpüla wekirajünjatüin wayuu sünnain tü shiimüinkat. Eekai maa'in naa'in, wakaaliijeechi. Eekai matüjaain saa'u tü nüshajakat Moisés, wekirajeechi”, müsü jünüiki. ²¹Tamüshii paala jia: Jia ekirajülikana wayuu, ¿jamüsü nnojotka'a jaa'inrüin tü jikirajakat anain? Jia achiajaakana wayuu suulia o'uwajaa, ¿jamaka'a ka'ruwaraliika'a jia? ²²Jia achiajaakana wayuu suulia ama'üjawaa sümaa wayuu nnojotkat su'wayuusein, ¿jamaka'a jiakana jüma'üjaaka'a sümaa wayuu nnojotkat ju'wayuusein? Jia alerajakana tü maleiwayaasükalüirua, ¿jamaka'a ju'luwajaka'a tü nakorolokat? ²³Jia a'waataakana sulu'u aapünaa amüin tü nüshajakat Moisés, ¿jamaka'a mojutka'a chi Maleiwakai jütüma sünnain nnojolüin jaa'inrüin tü nuluwataakat anain? ²⁴Ashajünüsü jüchiki sulu'u tü karaloukta nüchikimaajatkat chi Maleiwakai, müsü yaa: “Na gentilekana, mojujsai chi Maleiwakai natüma süka ne'rüin tü kasa mojusü naa'inrakat na judíokana no'upala”.

²⁵“Ayaawatüna aa'uchii waya judíokana sünnain nüpüshin waya

Maleiwa, süka shi'yotoonüin wata", müshii jia sünain ju'waataain sulu'u jukuaippa. Tamüshii paala jia: Aamasü jümüin tü o'yotoonookat ata müleka jüüjüüle jia sümüin tü nuluwataakat anain Moisés. Akaajasa müleka nnojorüle jüüjüüin jia sümüin, nnojoleerü kasain saamüin jümüin. Müshii aka ne'e naa'in wane wayuu eekai mo'yotoojuin nüta. ²⁶⁻²⁷ Je na gentilekana, mayaainje mo'yotoojuin nata, müleka naa'inrüle tü nuluwataakat anain Moisés, "Jia tapüshika", meechi chi Maleiwakai namüin. Otta jiakana o'yotoona atachiikana, ayoujüneena jia natüma, süka nnojolüin jüüjüüin jia sümüin tü nuluwataakat anain Moisés, ja'itaina jia in aapuushin amüin.

²⁸ "Jia tapüshika", nnojoiishi müin chi Maleiwakai sümüin wane wayuu sünainjee shi'yotoonüin süta. ¿Kasa atüjaanaka atüma naa'u wane wayuu sünain shiimüin nüpüshin nia Maleiwa? ²⁹ "Jia tapüshika", münüshii napüshua na eekai ne'itaanüin nütüma chi Naa'inkai Maleiwa süpüla nüpüshinjanain naya Maleiwa. Nnojoliishii naya e'itaanüin sünainjee o'yotoonaa ata, süpüla na'waajünüin sütüma wayuu. E'itaanüshii naya sünainjee shii'iranajaaitpain naa'in, süpüla na'waajünüin nütüma Maleiwa.

Lotüsü nukuaippa Maleiwa sünain süsaleerüin wayuu

saainjala nütüma

3 ¹ Tasakirüin paala jia: ¿Kasa anaka alu'u na wayuu judíokana noulia na gentilekana? ¿Kasa saamaka namüin tü o'yotoonookat ata? ² Eesüja'aya

anaka alu'u naya noulia na gentilekana, saa'u nayain aapünüin amüin palajana tü pütchi nünüikikat Maleiwa paala sümaiwa, je e'itaanüshii naya nütüma süpüla nekirajüinjatüin wayuu sünain tü pütchikat sainküin mmakat süpüshua.

³ Je müleka eere napüshi na judíokana eekai manoulain, ¿amalajaweerü saa'in jümüin tü naa'inrüinjatkat chi Maleiwakai sütüma? ⁴ Nnojoleerü amalajaain. Ayateeria naa'inrüin chi Maleiwakai tü nümakat. Ja'itairü aküjain alawaa wayuu süpüshua, pansaasü nünüiki chi Maleiwakai waneepia. Shia tü ashajünakat achiki paala sümaiwa. Müsü mayaa: "Lotüsü nukuaippa chi

Maleiwakai wanaa sümaa kasalajanain saainjala wayuu nütüma, süka pansaain waneepia nünüiki".

⁵ Eesü süpüla süsoktüin wane wayuu shi'ipajee tü tamakat, sünain maa tamüin: "Ja'itaina kaainjalain waya judíokana, nulatirüiny na ne'chi Maleiwakai tü waainjalakat woulia. Müleka nnojorüleje waa'inrüin tü kasa mojusúkat, nnojoiishije atüjaanüin aa'u chi Maleiwakai sünain alana'aleein lotüin ma'i tü nukuaippakat. Sükajee tia, nnojotsü anain süpüla süsaleenain waya waainjala nütüma, saa'in wamüin". ⁶ Tamüshii paala jia: Lotüshaatasü ma'i nukuaippa chi Maleiwakai sünain süsaleenain jia jaainjala nütüma. Müleka nnojorüleje lotüin nukuaippa sünain tüü, nnojotsüje nuuntüin süsalain saainjala wayuu süpüshua nütüma. ⁷ Mataalasü wane'eya: "Sütümajee

waküjain alawaa, shiyaawatüin wayuu naa'u chi Maleiwakai sünnain nnojolin müin aka waya, süka pansaain waneepia nünnüiki. Je saa'u kojutüin nia süttümajee tü mojusü waa'inrakat, ¿jamakuaippat süsalainjanain waya nüttüma?"

⁸Otta sünnüiki wane'eya tamüin: "Pikirajüin waya sünnain ayatüin sünnain waa'inrüin tü mojusukat shii'iree kojuteein chi Maleiwakai süttüma wayuu sünnainjee tü waainjalakat". Tamüshii paala jia: Nnojotsü shiain tekiraja anain tia. ¿Jamüshii ji'rülüika'a wayumüin sümmüin tü tamakat jümüin? Shiimüin sünnain lotüin ma'i nukuaippa chi Maleiwakai sünnain kasalajanainjatüin jaainjala nüttüma.

Nnojotsü jaralüin anajiraain nümaa Maleiwa sükajee tü nümakat Moisés

⁹Sünnainjee süpüshua tü tamüitpakat jümüin, müinjachi taya joolu'u jümüin: Waya judíokana, nnojoliishii waya alanaain noulia na gentilekana nu'upala chi Maleiwakai, süka süchepchiain kaainjalaa wayuu süpüshua, wayuu judío oo'ulaka wayuu gentile. ¹⁰Shia tü ashajünakat achiki paala sümaiwa sulu'u tü karaloukta nüchikimaajatkat Maleiwa, müsü mayaa:

"Nnojotsü wayuu eekai anajiraain nümaa Maleiwa.

Nnojotsü ein waneesüyaakaleje.

¹¹Nnojotsü wayuu eekai süshatüin aa'inraa tü anasükat.

Nnojotsü wayuu eekai nümweein Maleiwa.

¹²Nnojoiishi jamajachin chi Maleiwakai namüin na wayuukana napüshua, süka shiain jülüjüin naa'in tü mojusukat waneepia.

Nnojotsü wayuu eekai saa'inrüin tü anasükat.

Nnojotsü waneesüyaakaleje.

¹³⁻¹⁴E'rülüi wayumüin ma'i na wayuukana napüshua sümaa na'ürülaain ma'i.

Akülaashii alawaa, je ki'rashii ma'i sünnain aashajawaa perulaa.

Mülia aa'inrü wayuu süttüma nanüiki maa aka süchotokai maa'ala.

¹⁵Nashe'etaain wayuu.

No'utüin saa'in wayuu.

¹⁶Eepünaale no'unüin, shi'rüin müliaa wayuu natüma.

Namojujain sukuaippa wayuu.

¹⁷Natke'erüin wayuu süka tü naa'inrakat je tü namakat.

¹⁸Nnojoiishi jamajachin chi Maleiwakai namüin.

Mojutsai nia natüma".

¹⁹⁻²⁰Waya judíokana, saa'u saapünnüin wamüin tü nuluwataakat anain Maleiwa ashajünakat nüttüma Moisés, antinneena waya nümmülatu'umüin Maleiwa so'uweena wane ka'i süpüla wasoukttüinjanain nümmüin saaliijee nnojolüin waa'inrüin tü nümakat. Je iseerü wachiki asouktaa ni'ipajee Maleiwa saa'u waainjala. Soto jaa'in tü anajirawaakat nümaa Maleiwa, sünnain nnojolüin sünnainjeejatüin aa'inraa tü nuluwataakat anain Moisés, süka nnojolüin shiain süpülaajatüin. Aapuushi wamüin nüttüma Maleiwa süpüla wayaawatüinjatüin saa'u kaainjalain waya.

Anajiraashii waya nümaa Maleiwa sünnainjee ne'e anoujaa nünnain Jesucristo

²¹⁻²²Saa'u nnojolüin anajiraain wayuu nümaa Maleiwa sünnainjee aa'inraa tü nuluwataakat anain Moisés, ¿kasataalalakalaka

anajiraainjatiin aka wane wayuu nümaa? Anajiraashii waya nümaa Maleiwa sünainjee wanoujain nünain Jesucristo. Shia tü aküjünakat achiki paala sümaiwa natüma na nünüikimaajanakana Maleiwa oo'ulaka Moisés. Je nii'iyatüin shia chi Maleiwakai wamüin wapüshua maa'ulu yaa sulu'u tü nüchikikat chi O'tte'eriikai. Wayuu süpüshua, na judíokana oo'ulaka na gentilekana, che'ojaasü anajiraainjanain naya nümaa Maleiwa. ²³Che'ojaasü anajirawaa wamüin süka kaainjalain wayuu itämüinre'eya nuulia Maleiwa je sükatalaain suulia tü kasa anasü nüchekakat süpüleerua. Je nnojotsü nücheküin chi Maleiwakai ayatüin wayuu katatüin nuulia. ²⁴Anamia ma'i chi Maleiwakai sümüin wayuu süpüshua waneepia. Je saa'ujee anamiain ma'i nia, chi eekai nünoujain nünain Cristo Jesús, taashishi nia suulia naainjala sümaa anajiraain nia nümaa Maleiwa. ²⁵⁻²⁶Je paalainka, naawalüin chi Maleiwakai wayuu suulia süsalaa saainjala. Otta watüjaa aa'uchi nia sünain lotüin ma'i nukuaippa. Je süka lotüin nukuaippa, ni'rüin sünain che'ojaain nüjütüin chi Nüchonkai süpüla ouktajachin saa'u saainjala wayuu süpüla anajiraainjatiin wayuu nümaa. Shiasa maa'ulu yaa, saa'u ouktüichipain Cristo, nuuntüin chi Maleiwakai nülatirüin saainjala wayuu eekai sünoujain nünain Cristo sünain ouktüin nia saa'u saainjala. Sünain nüjütüin Cristo sa'akamüin wayuu, nii'iyatüin chi Maleiwakai wamüin sünain shiimüin lotüin ma'i nukuaippa je shiimüin nuuntüin anajiraainjatiin nümaa wayuu süpüshua eekai sünoujain nünain Jesús.

²⁷Nnojo ju'waataain sulu'u joonooin sümaa tü nuluwataakat anain Maleiwa, maa aka taküjaitpain jümüin sünain nnojoliin anajiraain wayuu nümaa Maleiwa sünainjee naa'inrüin tü nüshajakat Moisés. Watüjaa aa'ulu sünain shiain sümüiwa anajiraain anainjee waya tü wanoulakat nünain Jesús. ²⁸Tee'iyatüitpa jümüin sünain anajiraain wayuu nümaa Maleiwa, nnojotsü sükajeejatiin naa'inrüin tü nümakat Moisés namüin, sükajeejatü nanoujain nünain Jesús sünain ouktüin saa'u naainjala. ²⁹Chi Maleiwakai, nnojoiishi Wamaleiwasein ne'e wayakana judíokana wamüiwa. Namaleiwase na gentilekana wanaa wamaa. Je sükajee tia, Sümaleiwaseichipa wayuu süpüshua. ³⁰Waneeshia chi Maleiwakai anajiraakai atüma wayuu süpüshua. Na judíokana, o'yotoona atachiikana, oo'ulaka na gentilekana, mo'yotooju atachiikana, anajiraashii naya napüshua sünainjee ne'e anoujaa nünain Jesucristo. ³¹¿Jamakalaka tü nüshajakat Moisés? ¿Jamüinjatü sukuaiippa watüma, waya anajiraainapakana nümaa Maleiwa sünainjee wanoujain nünain Jesús? ¿Nnojoliitpa kasain saamüin wamüin joolu'u? Nnojolon. Alana'aleesia joolu'u sünain kojutüinjatiin shia watüma, süka wayaawatüitpain joo saa'u kasapülatüin shia wamüin nütüma Maleiwa.

Abraham, anajiraashi nümaa Maleiwa sünainjee nünoula

4 ¹Soto jaa'in nüchiki Abraham, chi watuushikai waya judíokana sümaiwa paala. ¿Kasa eejatka nüma'ana wanaa sümaa anajiraain nia nümaa Maleiwa?

²Watijaa aa'uchi Abraham sünain naa'inrūin wainma kasa anasü sümüin wayuu. Je müleka anajiraaleje nia nümaa Maleiwa sünainjee tü kasa anasü naa'inrakat, a'waataashije sulu'u tü naa'inrakat. Otta tamüshii paala jia: Nnojotsü kasain nu'waataain alu'u nu'upala Maleiwa. ³¿Jamüsü sünüiki tü karaloukta nüchikimaajatkat Maleiwa noo'opünaa Abraham? Müsü mayaa: “Nücheka achikit Maleiwa anajiraain Abraham nümaa sünainjee nünoujain nünüiki”.

⁴⁻⁵Watijaa aa'ulu sünain nücheküin chi Maleiwakai süpüleerua anajiraainjatüin wayuu kaainjarat süpüshua nümaa. Wane a'yataai, “Asülajünüsü tamüin neerü”, nnojoiishi müin. “Awalaajünüsü ta'yataain”, müshi. Alu'usa wayakana, müshii aka waya naa'in wane wayuu eekai nüsüljünüin amüin neerü sünain ma'yataain. Saa'ujee wanoujain nünain Maleiwa, nücheka achikit anajiraain waya nümaa. ⁶Nüküjain David paala sümaiwa nüchiki wane achekünakai amüin süchiki anajirawaa nümaa Maleiwa. Naashin David, nnojotsü sünainjeejatüin tü kasa anasü naa'inrakat, sükajeejatü nünoujain nünain Maleiwa. Anata'aleeshija'a ma'i chi wayuukai naashin David. Müsü tü nüshajakat:

⁷⁻⁸ “Anata'aleeshija'a ma'i chi wayuu alatinakai aainjala nuulia nütüma Maleiwa, süka motüin naa'in Maleiwa tü kasa mojusü naa'inrakat. Müiria nnojolüin jüljüjün aa'inyüü naainjala süpüla kasalajanaa nümüin nütüma Maleiwa”.

⁹¿Naya ne'e kamüinjanaka tü anajirawaakat nümaa Maleiwa

na o'yotoona atachiikana namüiwa? Nnojo. Namüinjatü shia na mo'yotooju atachiikana wanaa namaa. Tamüinapa'asa jia soo'opünaa nüchiki Abraham sünain nücheküin süchiki Maleiwa anajiraain nia nümaa sika nünoujain nünain. ¹⁰¿Joujatü nücheküin achiki Maleiwa tü anajirawaakat nümaa Abraham? ¿Anajiraashi nia süchikijee shi'yotoonüin nüta? Nnojo. Anajiraashi süpülapünaa. ¹¹Saa'u anajiraain Abraham süpülapünaa shi'yotoonüin nüta, shiyaawatüin wayuu saa'u anajiraain nia nümaa Maleiwa sünainjee tü nünoulakat ne'e sümüiwa. Jümeenakalaka joo tamüin: “¿Kasa apülaajatka shi'yotoonüin nüta?”. O'yotoona atachi nia süpüla sütüjaainjatüin wayuu naa'u sünain anajiraachipain nia nümaa Maleiwa. Je maa'ulu yaa, na gentilekana, mayaainge mo'yotoojuin nata, anajiraainapa naya nümaa Maleiwa sünainjee tü nanoulakat nünain, maa aka anajiraain paala Abraham süpülapünaa shi'yotoonüin nüta. Eekalaka süpüla namüin na gentilekana: “Washi nia'aya”. ¹²Watijaa aa'uchi Abraham sünain natuushin na judíokana, na o'yotoona atachiikana, saa'u ni'irukuin naya. Otta müshi'iya joolu'u, na judíokana eekai nashatüin tü nünoulakat Abraham süpülapünaa shi'yotoonüin nüta, shiimainchipa sünain nashin.

Ekettaajüsü tü pütchi pansaakat paala nümüin Abraham,

süka nünoujain nünain Maleiwa

¹³Watijaa aa'uchi Abraham oo'ulaka na nüikeyuukana sünain pansaain nünüiki chi Maleiwakai namüin sünain maa: “Anashaateechi

ma'li Abraham tatüma oo'ulaka tü wayuukolüirua sainküin mmakat süpüshua eekai sümüin: 'Nia Abraham washika' ". Tasakirüin paala jia: ¿Pansaasü, saa'in jümüin, nünüiki chi Maleiwakai namüin sünaainjee naa'inrüin tü nuluwataakat anain Moisés? Nnojo. Shia sünaainjee anajiraainapain naya nümaa Maleiwa sünaainjee nanoujain nünain. ¹⁴⁻¹⁵Müleka pansaaleje nünüiki chi Maleiwakai namüin sünaainjee aa'inraa tü nuluwataakat anain Moisés, ¿jamaka'a che'ojaaka'a namüin anoujaa nünain Maleiwa? Amülasüja'a mmata pansaain nünüiki sünaain anashaatainjanain ma'li naya nütüma, je na wayuu pansaakana amüin nünüiki Maleiwa, acheküsüje süsalain naya nnojorule naa'inrüin tü nuluwataakat anain Moisés. Akaajasa müleka nnojorule anajiraain wayuu sünaainjee aa'inraa tü nümakat Moisés, nnojoliija'a süsalainjanain na anoujashiikana maa aka nnojorule naa'inrüin shia.

¹⁶Tamüshii paala jia jüchikua: Pansaasü nünüiki chi Maleiwakai nümüin Abraham süka nünoujain nünain. Shiasa süka anamiain ma'li chi Maleiwakai nümüin Abraham, anajiraakalaka nia nümaa. Anamiakalaka nia joolu'u sümüin wayuu süpüshua eekai "Nia Abraham washika" sümüin sünaain sünoujain. Nnojoshi anamiain nia namüin na judíokana namüiwa, na aapünakana amüin tü nüshajalakat Moisés. Anamiashi namüin napüshua na eekai nanoujain nünain maa aka Abraham. Shiimüinkalaka niain Abraham washin waya anoujashiikana wapüshua. ¹⁷Jülüja jaa'in jarialin chi pansaain anüiki. Shiimüin niain

Maleiwa, chi Maleiwa nünoujakai anain Abraham, chi Maleiwa keraakai atüma tü nümakat sünaain pansaain nünüiki, chi Maleiwa oso'irakai saa'in wayuu ouktüsü, chi Maleiwa aküjakai süchiki tü naa'inrüinjatkat nnojolüiwa'aya naa'inrüin. Wamakalaka waya anoujashiikana süka süpüshua waa'in: "Anata'aleeshiija'a ma'li waya süka niain washin Abraham", maa aka tü ashajünakat nüchiki Abraham sulu'u tü nüchikimaajatkat Maleiwa, sünaain müin mayaa: "E'itaanüshi pia tatüma süpüla piainjachin süshin wayuu wainma sainküin mmakat".

¹⁸Süpüla nikeraajüinjatüin chi Maleiwakai tü nümakat nümüin Abraham sünaain pansaain nünüiki, acheküsü naapüin kachonwaa nümüin. "Iseerü süchiki ayaawajünaa tü püükeyuukalüirua, süka wainmeerüin ma'li shia", müshi chi Maleiwakai nümüin Abraham. Mayaainje laülaain Abraham sünaain machonwaa, katsüinsü tü nünoulakat sünaain na'atapajüin tü naa'inrüinjatkat chi Maleiwakai nümüin. Sükajee tia, müirüjese wattain saalin nüükeyuu sainküin mmakat maa'ulu yaa. ¹⁹"¿Jamakuaippaliikai waya süpüla kachoinjanain?", müsü naa'in nüle'eru'u Abraham. Mayaainje sülü'ülüin polooïn shikii juya nuuyase je maralüin Sara tü nu'wayuusekat, ayatsü nünoujain sünaain naapeerüin Maleiwa kachonwaa namüin. ²⁰⁻²¹Nnojotsü naapüin naa'in sünaain maa: "Matüjainsai Maleiwa ekerajaa tü nümakat tamüin". Shia eeka katsüin tü nünoulakat sümaa nu'waajüin Maleiwa waneepia. "Shiimüin sünaain nuuntuin nikeraajeerüin

Maleiwa tü nümakat tamüin sünnain pansaain nünüiki”, müshi. ²²Tamüshii paala jia: Sükajee nünoujain Abraham tü nümakat chi Maleiwakai nüümüin, ekettaajüsü tü ashajuushikat: “Nücheka achikit Maleiwa anajiraain Abraham nümaa”, makat. ²³⁻²⁴Tia pütchikat, nnojotsü nüpülajatiin Abraham nüümüiwa, wapülajatu wayakanaya. Nücheka achikit Maleiwa anajiraain waya nümaa sünnainjee wanoujain nünüiki. Nia chi Maleiwa Pülashikai ma'i, chi oso'ire'etkai naa'in Wasenyotsekai Jesús süchikijee ouktaa. ²⁵Watüjaa aa'ulu sünnain naapüin chi Nüchonkai süpüla ouktajachin nia saa'u waainjala, je sünnain nüso'ire'erüin naa'in süchikijee ouktaa süpüla anajiraainjanain waya nümaa.

**Tü anaawaakat nümaa
Maleiwa nünainjee Cristo**

5 ¹Saa'u anajiraainapain waya nümaa chi Maleiwakai sünnainjee tü wanoulakat nünain, anaitpa joolu'u tü waa'inkat nu'upala nütüma chi Wasenyotsekai Jesucristo. ²Sünnainjee tü naa'inrakat Cristo, nii'iyatüin chi Maleiwakai na'anasia wamüin. Je maa'ulu yaa, kamalaintpa wamüin tü anajirawaakat nümaa. Je saa'u anajiraainapain waya nümaa, talatashaatasü ma'i waa'in saa'u nnojoliinapain katatüin waya suulia tü kasa anasü nüchekakat Maleiwa wapüleerua, süka watüjaain saa'u sünnain wama'anainjatüin shia süpüshua so'uweena wane ka'i. ³Ja'itairü we'rüin müliaa, ayatsü talatüin waa'in su'utpünaa tia. Sükajee tü müliaakat, watüjeerü wachecherüin waa'in sünnain anoujaa.

⁴Je walatirapa tü müliaakat, “Lotüsü jukuaippa to'upala”, meechi chi Maleiwakai wamüin. Je sükajee talatüin nia wamaa, watüjaa aa'ulu sünnain ayateenain nükaaliijüin waya müleka we'rüle müliaa wachikua.

⁵Je nnojoleena waya e'rüin japülli, süka wakaaliijüneenain nütüma Maleiwa sünnain katsüinjatiin tü wanoulakat. Nükaaliijeena waya süka alin ma'i waya nüpüla. Je chi Naa'inkai Maleiwa aapünakai wamüin, nii'iyatüin wamüin sünnain alin ma'i waya nüpüla Maleiwa.

⁶Je paalainka, nnojotsü wountüin anajiraain waya nümaa Maleiwa, süka nnojolin jamajachin nia wamüin. Wanaa sümaa tia, ouktüshi Cristo süpüla nu'tte'erüinjanain waya. ⁷Ja'itaichi takaaliijeein ma'i wane wayuu, nnojorüleerüja'a tacheküin ouktüin taya naa'ujee, ja'itaichi niain wane wayuu aa'inrakai süpüshua tü nuluwataakat anain Moisés, ja'itaichikeje niain wane wayuu kamaneekai waneepia sümüin wayuu. ⁸Akaajasa Cristo, nnojotsü niyoukta achiki ouktaa waa'u. Je mayaa'inje kaainjaraliin waya, ouktüshia ne'e nia waneepia waa'ujee. Süka tüü, nii'iyatüin Maleiwa wamüin sünnain alin ma'i waya nüpüla.

⁹Sotoyoosüje jaa'in tü taküjakat jümüin süchiki süsaleerüin saainjala wayuu nütüma Maleiwa so'uweena wane ka'i. Otta wayakana, mayaa'inje kaainjalain waya paalainka, anajiraainapa waya joolu'u nümaa Maleiwa sünnainjee tü nüshakat Jesús amülakat sünnain ouktüin saa'u waainjala. Je sükajee tia, o'tte'ennüshii waya nütüma Cristo. Müinaya waya nnojoliin süsalain

waainjala nütüma. ¹⁰Tamüshii paala jia jüchikua: Mayaainje mojaawain waya paalainka nümaa Maleiwa, anaawashii waya joolu'u nümaa sütüma tü naa'inrakat chi Nüchonkai sünain ouktüin nia waa'ujee. Je süka anaawainapain waya nümaa Maleiwa, shiimüin sünain wo'tte'ennüinjanain nütüma Cristo süka katüitpain no'u. ¹¹Je naapüin wamüin chi Maleiwakai miyo'ushaata talataa aa'in, sükajee tü naa'inrakat Jesucristo chi Wasenyotsekai. Nia kakajeejanaka anaawain waya nümaa Maleiwa.

Ouktaa nünainjee Adán otta anajirawaa nünainjee Cristo

¹²Taso'iree aa'inchii jia sünain anain ma'i tü naapakat wamüin Cristo, je sünain mojuin ma'i tü naapakat wamüin Adán. Kaainjalashi Adán nuulia Maleiwa sükajee niyouktajaain sümaa nünüiki nümüin. Ouktakalaka nia saaliijee. Je sükajee kaainjalain Adán, o'ttüsü wayuu ütämüinre'eya sünain kaainjalaa. Ouktakalaka naya saaliijee. ¹³⁻¹⁴Je wanaa sümaa tia, nnojotsü kasalajanain sümüin wayuu moonoinwaa sümaa tü nüshajalakat Moisés, süka nnojolüin eejatüin shia. Mayaainje'e nnojolüin nayouktajaain nünüiki Maleiwa, maa aka Adán, ouktüshi'iya ne'e waneepia napüshua'ale'eya süka wayuun kaainjaralii naya.

¿Jamüsü waneejatüka'a tü aapuushikat wamüin nütüma chi Maleiwakai suulia tü aapuushikat wamüin nütüma Adán? ¹⁵Sükajee kaainjalain Adán, shi'rüin ouktaa tü wayuukolüirua süpüshua. Alu'usa tü naapakat wamüin chi Maleiwakai nünainjee Jesucristo,

alana'aleesia ma'i sünain anain shia. Anamiashaatashi ma'i chi Maleiwakai süpüla naapüin chi Nüchonkai wamüin. Je tü kasa anasü naa'inrakat Cristo, süpülatü wayuu süpüshua'ale'eya. ¹⁶Müshi taya tachikua: Tü naapakat wamüin chi Maleiwakai, alana'aleesia ma'i sünain anain shia. Otta tü naapakat wamüin Adán, mojusü. Saa'ujee naainjala waneeshia wayuu, kasalajanasü sümüin saainjala wayuu süpüshua sümaa sükatalaain nuulia Maleiwa. Otta saa'u tü naa'inrakat Cristo, anajiraajeerü wayuu watta saalin nümaa Maleiwa. ¹⁷Saa'u naainjala Adán, o'ttüsü wayuu süpüshua sünain kaainjalaa je ouktüshii naya saaliijee. Otta saa'u tü naa'inrakat Jesucristo, chi wayuu aapaakai na'anasia Maleiwa süpüla anajiraainjachin nümaa, katsüinsü naa'in sünain anoujaa.

¹⁸Tamüshii paala jia jüchikua: Tü naapakat chi Maleiwakai wamüin nünainjee Cristo, alana'aleesia ma'i sünain anain. Otta tü naapakat wamüin Adán, mojusü. Nükajee Adán, saa'u kaainjalain nia, e'itaanüsü wayuu süpüshua nütüma Maleiwa süpüla süsalainjatüin saainjala sümaa katatüinjatüin nuulia. Otta nükajee Cristo, saa'u tü anasü naa'inrakat sünain ouktüin waa'ujee, nnojoleerü kasalajanain wamüin waainjala. Taashishii waya suulia süsalaa waainjala je müinaya nnojoliin akatannüin nuulia Maleiwa. ¹⁹Saa'ujee moonoin Adán sümaa nünüiki Maleiwa, o'ttüsü wayuu ütämüinre'eya sünain kaainjalaa. Otta müsia joolu'u, saa'ujee noonoin Jesucristo sümaa nünüiki Maleiwa, ceitpa süpüla anajiraain wayuu maleekalia.

²⁰Mapa kakalia nüchikijee Adán, aapünüsü sümüin tü wayuu judfokaliürüa tü nüshajakat Moisés nütüma Maleiwa. Aapünüsü shia süka nüchekiün Maleiwa shiyaawatüinjatüin wayuu sünnain shiimüin kaainjaraliin naya. Otta müsia joolu'u, mayaainje kaainjaraliin ma'i tü wayuukolüürüa, nountüitpa anajiraain naya nümaa Maleiwa süka anamiashaatain ma'i nia namüin. ²¹Tü taküjüitpakat achiki jümüin, müsü mayaa: Na wayuu süchepchiakana kaainjalaa, oukteena naya napüshua sümaa katatüin naya nuulia Maleiwa. Otta wayakana, nnojoleena nukataliün nuulia, süka anamiashaatain ma'i nia. Saa'u wanoujin nünain chi Wasenyotsekai Jesucristo, wountüin wapüshua anajirawaa nümaa Maleiwa sümaa su'wanajaain waa'in süpüla chainjanain waya nümaa weinshi.

Taashishii waya nütüma Cristo suulia süchepchiaa waainjala

6 ¹Eesüja'a süpüla sümüin wane wayuu: “Anamiapaja'a ma'i chi Maleiwakai süpüla anajiraainjatüin wayuu nümaa ja'itairü wainmain saainjala. Je saa'u nülatirüin chi Maleiwakai saainjala wayuu, anakaja masütaajule waya sünnain waainjala süpüla koo'omüinjatüin na'anasia Maleiwa wamüin”. ²Nnojotsü shiain tia. Maa aka taashin wane wayuu ouktüsü suulia sukuaippa, taashiinapa waya suulia süchepchiaa waainjala. Woo'ulaweekalaka suulia kaainjalaa. ³Wanaa sümaa wowoutisaajünüin waya anoujashiikana, müshii aka ouktiraakai waya nümaa Cristo. ⁴Je maa aka nojoitünüin Cristo

süchikijee ouktaa, müshii aka wojoitünakai wanaa nümaa. Je maa aka nüso'iraain aa'in Cristo süchikijee ouktaa nütüma chi Nüshikai Pülashikai ma'i, aka'aya wayakana, müshii aka woso'iraakai aa'in wanaa nümaa. Je süka jeketüitpain wakuaippa, wountüin woo'ulaain suulia waainjala.

⁵Tamüshii jia jüchikua: A'aniraaitpa wakuaippa nümaa Cristo. Maa aka ouktüin nia, müshii aka ouktakai waya wanaa nümaa saa'u nnojoliün kasajatüin wamüin kaainjalaa. Je maa aka suso'iraain naa'in Cristo, akaweenia wayakana oso'iraweeria waa'in mapeena. ⁶Maa aka nüchitünüin Cristo sünnain kuruusakat süpüla ouktaa, aka'aya tü wakuaippakat, achitünüüsü süpüla ouktaa wanaa nümaa. Nnojoliinapa joolu'u süchepchiain waya kaainjalaa. ⁷Maa aka taashin wane wayuu ouktüsü suulia sukuaippa, taashiinapa waya suulia süchepchiaa waainjala.

⁸Saa'u ouktüin waya wanaa nümaa Cristo, watüjaa aa'ulu sünnain katüinjatüin wo'u wanaa nümaa. ⁹Saa'u suso'innüin naa'in Cristo süchikijee ouktaa, watüjaa aa'uchi nia sünnain nnojoleechin ouktüin piantua. Nnojolichipa süchepchiain nia tü ouktaakat. ¹⁰Süka ouktüichipain Cristo saa'u saainjala wayuu, nnojoleechi ouktüin nüchikua. Eeshi nia nümaa Maleiwa maa'ulu yaa sünnain katüinjatüin no'u süpüla ka'ikat süpüshua. ¹¹Akaajaa jakana, saa'u müin aka ouktakai jia, anakaja jiyaawatüle saa'u sünnain taashiinapain jia suulia süchepchiaa kaainjalaa. ¹²Sükajee tüü, juu'ulaa jumata suulia süchepchiaa jia kaainjalaa.

Nnojo joonooiin sümaa tü mojusü keejiakat sümüin tü ji'iruku jookot süpüla ouktaa. ¹³Nnojo jaapüin ji'iruku süpüla kaainjalaa, süpüla jaa'inrüinjatüin kasa mojusü süka. Nnojo motüin jaa'in sünain katüinapain jo'u nütüma Maleiwa. Shia anaka alu'u joolu'u jaapajiraale jukuaippa nümüin. Jaapa ji'iruku nümüin süpüla jaa'inrüinjatüin kasa anasü süka. ¹⁴Soto jaa'in sünain anajiraainapain jia nümaa Maleiwa sünainjee anamiashaatain nia jümüin süpüla taashinjanain jia nütüma suulia süchepchiaa kaainjalaa. Nnojoliishii jia müin aka naa'in na wayuu aapünakana amüin tü nuluwataakat anain Moisés, tü nnojotkat akaaliijain naya suulia kaainjalaa. Je sükajee tia, juu'ulaa suulia süchepchiaa kaainjalaa.

Nüchepchiainapa waya Maleiwa

¹⁵¿Jamakalaka joo shia?

¿Ayatüinjana waya masütaajuin sünain waainjala süka anajiraain waya sünainjee anamiashaatain chi Maleiwakai wamüin je nnojolüin sünainjeejatüin woonooiin sümaa tü nüshajakat Moisés? Nnojotta. ¹⁶Soto jaa'in wane kasa. Müleka jaapajiraale jukuaippa nümüin wane wayuu süpüla nüchepchiainjanain jia, nieechi jülaamainka. Akaajaa müleka jaapajiraale jukuaippa sünain aa'inraa kasa mojusü, süchepchieena jia kaainjalaa, je oukteena jia saaliijee. Alu'ujasa müleka jaapajiraale jukuaippa nümüin Maleiwa süpüla jüüjüüinjanain jia nümüin, loteertü jukuaippa nu'upala. ¹⁷Taapüin analu'ut nümüin chi Maleiwakai jaa'u. Süchepchiapü'üshii jia kaainjalaa paalainka. Je joolu'u,

oonooshii jia süka süpüshua jaa'in sümaa tü shiimüin ekirajünakat anain jia maa'ulu yaa. ¹⁸Taashiinapa jia suulia süchepchiaa kaainjalaa. Nüchepchiainapa jia Maleiwa süpüla aa'inraa tü kasa anasü nüchekakat jüpüleerua.

¹⁹Tü taküjaitpakat jümüin, taküjain süka pütchi sütüjaakat aa'u wayuu sainküin mma. Müsü joo tü tekirajeekat anain jia jüchikua: Süchepchiapü'üshii jia kaainjalaa paalainka sünain jaa'inrapü'üin waneepia tü kasa yarüttakat atüma jaa'in süka tü ji'irukukat. Otta müsia joolu'u, saa'u nüchepchiainapain jia Maleiwa, nücheküin süpüleerua jükatalaain suulia jaainjala. Je sükajee tüü, anakaja müleka jaapüle ji'iruku nümüin süpüla jaa'inrüinjatüin waneepia tü nuluwataakat anain jia. ²⁰Soto jaa'in tü jukuaippakat paalainka. Wanaa sümaa süchepchiapü'üin jia kaainjalaa, nnojotsü kachipünaain jaa'in tü nuluwataakat anain jia Maleiwa. ²¹Kasayaa ne'e saapüin jümüin tü kasa mojusü jaa'inrakat. Joolu'u, japüliinapa jia süka tü jaa'inrapü'ükat. Chi wayuu ayatakai aa'inrüin kasa makat aka tia, oukteechi nia sümaa amülouleechin nia nuulia Maleiwa. ²²Otta müshi'iyaa jia joolu'u, taashiinapa suulia kaainjalaa, je nüchepchiainapa jia Maleiwa. ¿Kasa saapaka jümüin tia? Eejeena jia nümaa chi Maleiwakai süpüla ka'ikat süpüshua süka shii'iranajaaitpain jaa'in sümaa jükatalaain suulia jaainjala. ²³Alu'ujasa chi wayuu ayatakai süchepchiain kaainjalaa, shiimüin ouktajachin nia saaliijee sümaa amülouleechin nia nuulia Maleiwa. Otta chi eekai sa'aniraain

nukuaippa nümaa Cristo Jesús chi Wasenyotsekai, ee'Iranajaweerü naa'in süpüla chainjachin nia nümaa Maleiwa waneepia.

Müshii aka ouktakai waya suulia tü nüshajakat Moisés

7 ¹ Je joolu'u tawalayuwaa, jütüjaa aa'ulu tü nuluwataakat anain Maleiwa ashajünakat nütüma Moisés napüla na jud'okana sünnain sümünjatüin wayuu süma'inru'u katüin so'u. ²⁻³ Maa aka tü wayuu ka'wayuusekat, aluwataanüsü sütüma tü nüshajalakat Moisés sünnain nnojölünjatüin shii'iratüin su'wayuuse süma'inru'u katüin no'u. Müleka ka'wayuuse shia wane wayuu naata kataiwa'aya no'u chi su'wayuusekai, "Ama'üjaasü nümaa wayuu nnojokai su'wayuusein", müneerü shia. Akaajasa müleka ouktüle chi su'wayuusekai, jutatüsü sukuaippa süpüla ka'wayuusee wane jekechi. "Ama'üjaasü nümaa wayuu nnojokai su'wayuusein", nnojoleerü münüin.

⁴ Akaajaa jiakana tawalayuwaa, müshii aka ouktakai jia suulia tü nüshajakat Moisés sükajee ouktüin Cristo saa'u waainjala. Sükajee jutatüitpain wakuaiippa suulia tü suluwataakat anain, a'aniraaitpa wakuaiippa nümaa Cristo. Je sünnainjee süso'iraain naa'in süchikijee ouktaa, wountüin joolu'u wa'yataain nümüin Maleiwa sümaa waa'inrüin tü anasükat nümüin waneepia. ⁵ Soto jaa'in tü wakuaiipakat paalainka wanaa sümaa wale'eru'uin süchiki kaainjalaa maa aka wayuu süpüshua. Wanaa sümaa saapünüin wamüin tü nuluwataakat anain waya Moisés, müsü aka sootokai waya

sünnain aa'inraa tü kasa mojusü achiajaanakat oulia waya sulu'u. Je müleka mache'ere waya sünnain aa'inraa waneepia kasa eekai müin aka tia, shiimüin sünnain ouktajanain waya sümaa amüloulinjanain nuulia Maleiwa. ⁶ Mayaainje süchiajaain waya tü nuluwataakat anain Moisés, ayatshii'ya waya sünnain süchepchiain waainjala. Alu'usa joolu'u, müshii aka ouktakai waya suulia tü nüshajalakat Moisés, süka jutatüitpain wakuaiippa suulia tü suluwataakat anain. Nnojoliikalaka wa'yataain joo nümüin Maleiwa süka tü akuaiippaa laülaasükat ee'iyatünakat wamüin sulu'u tü nüshajakat Moisés. A'yataainapa waya nümüin Maleiwa joolu'u süka wane jeket akuaiippaa nütüma chi Naa'inkai.

Tü atkawaakat sütüma wale'eru'uin kaainjalaa

⁷ Eesüja'a süpüla sümüin wane wayuu: "Mojusüja'a mmata tü nüshajakat Moisés, naakaja müin aka sootokai waya sünnain aa'inraa tü kasa mojusü achiajaanakat oulia sulu'u". Nnojoluyaaaje shiain tia. Nnojotsü mojuin, anasü. Sütüma tü nuluwataakat anain Moisés, tayaawata aa'u sünnain kaainjaralin taya. Je taküjüin paala tachiki jümüin: Eesü müleka kee'ireere taa'in tü süma'anakat wane wayuu. Tüü, nnojotsü tayaawata aa'u sünnain kaainjalaa shia. Tü tayaawatakat atüma saa'u, shia tü nuluwataakat anain, eere sümüin: "Nnojoo kee'ireein paa'in naata kokoroloshi". ⁸ Je tatüjaapa saa'u sütüma tü nüshajakat Moisés sünnain mojuin tü taa'inrakat, keejialeitpa'aya tamüin suulia paalainka. Müleka

nnojoruleje tachiajaanüin suulia aa'inraa tia, nnojotsüje alana'aleein ma'i keejiajn tamüin. ⁹Nnojolüiwa'aya tatüjaain saa'u tü nuluwataakat anain Moisés, nnojotsü ashopataain taa'in saa'u taainjala. Otta tatüjaapa saa'u, müshi aka sootokai taya sünnain aa'inraa tü kasa mojusü achiajaanakat oulia sulu'u. Je müleka ayatüle taya sünnain süchepchiajn kaainjalaa, shiimüin sünnain ouktajachin taya saaliijee sümaa amülouleechin nuulia Maleiwa. ¹⁰Tü nuluwataakat anain Moisés, süpülatüyaaje'e su'tte'erüinjachin taya suulia amüloulüi nuulia Maleiwa. Akatsa e'itaain ouktaa tamüin süsala taainjala. ¹¹Tatüjaapa saa'u sütüma tü nüshajakat Moisés sünnain mojuin tü taa'inrakat, ¿jamaka'a nnojotka'a too'ulaain suulia? Shia süka shiain toonoin amaa tü alawaakat sütüma süchepchiajn taya taainjala. Je sükajee nnojolüin jüüjüüin taya sümüin tü nuluwataakat anain Moisés, e'itaasü ouktaa tamüin süsala taainjala. ¹²Shia tamaka jümüin tia: Tü nüshajakat Moisés, aapünüsü wamüin nütüma chi Maleiwa Maainjalasaikai. Nnojotsü mojuin shia, anasü, süka shii'iyatüin wamüin tü kasa anakat süpüla waa'inrüinjatüin je tü kasa mojukat süpüla nnojolüin waa'inrüin.

¹³Eesü süpüla sümüin wane wayuu: "Müleka anale tü nuluwataakat anain Moisés paajüin, ¿jamakalaka shi'itaaka'a ouktaa sümüin wayuu je amüloulüi nuulia Maleiwa?". Tamüshii paala jia: Nnojotsü shiain tia. Tü nüshajakat Moisés, nnojotsü ouktajatüin wayuu sütüma. Ouktajatü wayuu saaliijee nnojolüin suu'ulaain

suulia kaainjalaa. Chi wayuu eekai ayatüin sünnain süchepchiaa naainjala, müleka nnojorule kasalajanain nümüin naainjala, nnojoleerü niyaawatüin aa'u sünnain mojushaatajn ma'i tü kaainjalaakat. Tü nüshajakat Moisés, sükaaliijain waya sünnain wayaawatüin saa'u tüü.

¹⁴Watüjaa aa'ulu tü nuluwataakat anain Moisés sümaa saapünüin nütüma Maleiwa. Otta tayakai, maa aka wayuu süpüshua sünnain ke'irukuin, süchepchiashi taya kaainjalaa. ¹⁵⁻¹⁶Anasü taküjale paala tachiki jümüin. Shiimüin sünnain nnojolüin tayaawatüin saa'u jamüinjatüin taa'inrüin tü kasa taa'inrakat. Tü kasa anasü tachekekak sünnain taa'inreein, nnojotsü taa'inrüin. Shia taa'inraka tü kasa mojusü nnojotkat tacheküin taa'inreein. Je sükajee tatüjaain saa'u tü taa'inrakat sünnain mojuin shia, "Lotüsü ma'i tü nuluwataakat anain Moisés", tamüsü. ¹⁷⁻¹⁸¿Jamüsü taa'inraka'a tü mojusü nnojotkat tacheküin taa'inreein je nnojolüin taa'inrüin tü anasükat? Shia süka tale'eru'uin tü kaainjalaakat. ¹⁹Tamüshii paala jia: Tü taa'inrakat, nnojotsü shiain tü kasa anasü tachekekak taa'inreein, shia ne'e taa'inraka tü kasa mojusü nnojotkat tacheküin taa'inreein. ²⁰Je taa'inrüin tü mojusü nnojotkat tacheküin taa'inreein, süka jo'uutüjüln taya sümaa taainjala.

²¹Müsü sukuaippa tü taküjaitpakat achiki jümüin: Mayaainje tacheküin taa'inreein kasa anasü, ayatsia ne'e taneeküin aa'inraa tü kasa mojusükat. ²²Tacheküin taa'inreein tü kasa anasü nuluwataakat anain Maleiwa, süka shii'iranajaaitpain takuaippa nütüma. ²³Otta

müleka shiimüinre tia, ÷jamaka'a taneekaka'a waneepia aa'inraa tü kasa mojusukat? Shia süka tale'eru'uin kaainjalaa. Je sükajee tüü, müsü aka eekai wane atkawaa sütüma tü takuaippa jeketkat. Je müshi aka kapükai taya, süka nnojliün tountüün taa'inrüün tü anasükat. ²⁴⁻²⁵Müshi paala tachikua: Saa'u nii'iratüütpain chi Maleiwakai takuaippa, nüchepchiaichipa joo taya, sümaa shiain tacheküün waneepia taa'inreein tü kasa anasü nuluwataakat anain. Akaajasa, süka jo'uushin taya sümaa taainjala, ayatshia müin aka kapükai taya. Aa'inraa tü kasa anasükat, kapüleesü. Otta aa'inraa tü mojusukat, mapüleesat. Alu'uta'aleeshija ma'i taya süchepchiaaka taainjala. Kasataalejese tajuittinnüün maalü suulia. Akatsa een wane kasa. Tatüjaa aa'ulu sünain tajuittinneechin maalü nütüma chi Wasenyotsekai Jesucristo. Taapakalaka ma'i joo müle'oshaata analu'ut saa'u tia.

Chi Naa'inkai Maleiwa nükaaliijain waya suulia kaainjalaa

8 ¹Chi wayuu eekai sa'aniraain nukuaippa nümaa Cristo Jesús, müichia nnojolin süsalain naainjala nütüma Maleiwa sümaa nnojolin nükatülüin nia nuulia. ²Chi wayuu eekai jüüjüün waneepia nüümüin chi Naa'inkai Maleiwa, taashishi suulia süchepchiaa naainjala. Paalainka, ouktajana waya wapüshua süka kaainjaraliin. Otta müsia joolu'u, sünainjee tü naa'inrakat Cristo Jesús, taashishii waya suulia süchepchiaa kaainjalaa je suulia tü ouktaakat, süka pülashin ma'i chi Naa'inkai Maleiwa aapakai wamüin kataa

o'u. ³Tü nuluwataakat anain Moisés, nnojotsü suuntüün sujüittirüün waya suulia tü ouktaakat, süka wale'eru'uin tü kaainjalaakat. Chi taashikai atüma waya, nia Maleiwa. Nuluwataain Jesucristo chi Nüchonkai, sünain wayuün nia maa aka waya kaainjaraliikana. Sünainjee naapajiraain nikii süpüla ouktaa saa'u waainjala, süsalashi nia tü waainjalakat nütüma Maleiwa. ⁴Je saa'u wajuittinnüünapain suulia tü ouktaakat, wounteerü wekeraajüin süpüshua tü kasa anasü nüchekakat wapüleerua chi Maleiwakai sulu'u tü nüshajakat Moisés. Wounteerü wekeraajüin sükajee nnojoliinapain wale'eru'uin süchiki kaainjalaa saa'u jüüjüün waya waneepia nüümüin chi Naa'inkai Maleiwa.

⁵Chi wayuu eekai kee'ireein naa'in tü mojusukat, shia süka nüle'eru'uin süchiki tü kaainjalaakat. Otta chi eekai kee'ireein naa'in tü nüchekakat chi Naa'inkai Maleiwa, shia süka nüchepchiaain Maleiwa.

⁶Müleka masütaajule wane wayuu sünain jülüjüün naa'in tü nüchekakat chi Naa'inkai Maleiwa, aapüneerü wane ana nüümüin nütüma Maleiwa saa'u taashiichipain nia suulia tü ouktaakat. Akaajasa chi eekai masütaajuin sünain jülüjüün naa'in kaainjalaa, oukteechi nia saaliijee tia sümaa nükatannüün nuulia Maleiwa. ⁷Süka jamüin, chi jülüjakai aa'in waneepia kaainjalaa, nnojishi oonoon sümaa tü nuluwataakat anain Maleiwa. Isasü nüchiki, süka nü'ürülaain nüünain.

⁸Na wayuu eekai kale'eru'uin süchiki kaainjalaa, nnojoruleeja kasakainjatüün natüma talatüün Maleiwa namaa.

⁹Otta jiakana, nnojoliinapa kale'eru'uin süchiki kaainjalaa. Saa'u ein chi Naa'inkai Maleiwa sulu'u jaa'in, niaichipa jüüjüüka amüin jia. Chi wayuu eekai nnojolin chi Naa'inkai Maleiwa sulu'u naa'in, nnojishi nüpüshin nia Cristo. ¹⁰Wayakana, saa'u wayuuin waya, we'reeria tü ouktaakat saaliijee kaainjalaa. Otta müshi'iyaa joolu'u, saa'u wamaaichipain Cristo, nümaainjana waya Maleiwa waneepia sükajee anajiraainapain waya nümaa. ¹¹Jütüjaa aa'uchi chi Maleiwakai sünain niain oso'ire'eriin naa'in Jesús süchikijee ouktaa. Meena'aya jiakanaya. Saa'u eeichipain chi Naa'inkai Maleiwa sulu'u jaa'in, ja'itairü j'i'reeriin tü ouktaakat, ayateena nümaa Maleiwa waneepia.

¹²Tawalayuwaa, saajüin tü taküjaitpakat jümüin, ¿kasa anaka süpüla waa'inrüin? ¿Anasü müleka wale'eru'ule süchiki kaainjalaa? Nnojo. Nnojotsü anain tia. Tachiajaain jia joolu'u suulia tia. ¹³Müleka masütaajule jia sünain jüle'eru'uin süchiki kaainjalaa, oukteena jia saaliijee sümaa jükatanneenain nuulia Maleiwa. Akaajasa, müleka juu'ulaale suulia süpüshua tü kasa mojusü kee'ireekat jaa'in, nümaajeena jia Maleiwa süpüla ka'ikat süpüshua. Nieechi chi Naa'inkai Maleiwa akaaliijaka jia sünain tia.

¹⁴Chi wayuu eekai jüüjüüin nüümüin chi Naa'inkai Maleiwa, shiimüin sünain nüchoin Maleiwa. ¹⁵Saa'u naapünüichipain wamüin chi Naa'inkai, nnojoliinapa waya mmolüin sheema süchepchiaa kaainjalaa wachikua. Alu'ujasa joolu'u, süka nüchooinapain

waya Maleiwa, “Taata Maleiwa”, wainküin wamüin nüümüin. ¹⁶Nükaaliijain waya chi Naa'inkai sünain ayaawataa saa'u sünain nüchooinapain waya. ¹⁷Nüchon wane wayuu, kapatseinjachi nütüma. Akaweenia wayakana nütüma Maleiwa, saa'u nüchooinapain waya. Ejeerü wama'ana süpüshua tü kasa anasü anaajuushikat nütüma chi Maleiwakai napüla na nüpüshikana. Je wanaa nümaa Cristo, eejeerü wama'ana süpüshua tü kasa anasü naapünjatkat chi Maleiwakai nüümüin. Watüjaa aa'uchi sünain müliain paala Cristo. Je wayakana, saa'u müliain waya sünainjee wanoujain nünain, meena'aya joo waya maa aka naa'in sünain anashaateenain ma'i waya no'ulu'u Maleiwa so'uweena wane ka'i.

Müliaa joolu'u otta anaa mapeena

¹⁸Shiimüin tü tamakat jümüin: Mayaasüje miyo'ushaatain tü müliaa we'rakat maa'ulu yaa, nnojoleerü sotüin waa'in shia so'uweena ka'ikat tia, süka anashaateenain ma'i waya no'ulu'u Maleiwa. ¹⁹So'u ka'ikat tia, ee'iyatüneena waya nütüma chi Maleiwakai sümüin tü kasa akumajuushikalüirua sümaiwa paala sünain nüchooin waya. Sükajee tüü, sa'atapüin ma'i waya türa kasakalüirua süpüla wee'iyatünüin sümüin. ²⁰Süchikijee nukumajüin Maleiwa tü kasakalüirua süpüshua, niyüülajüin shia suulia shikeraajajüin tü akumajünakat apüla. Nnojotsü süchekalain. Aleinjatü nütüma Maleiwa, süka nütüjaain saa'u sünain naa'inrüinjatüin wane kasa anasü sümüin so'uweena wane ka'i. ²¹A'atapusü ma'i tü

akumajuushikalüürua joolu'u sujuitinnünjatüün suulia sümüliala so'u ka'ikat tia. Meeria aka shia wayakana nüchookkana Maleiwa sünain anashaataleein ma'i no'ulu'u Maleiwa.

²² Watüjaa aa'ulu sünain müliayülüinya süpüshua tü kasa akumajuushikalüürua, je kee'ireesü ma'i saa'in taasheen shia suulia. Müliasü ma'i shia maa aka saa'in wane wayuu eekai sa'alijaain. ²³ Otta wayakanaya, kee'ireesü ma'i waa'in taasheen waya suulia ouktaa je shii'iree wee'iyatünüin sümüin süpüshua tü akumajuushikalüürua sünain nüchooin waya Maleiwa. Je maa'ulu yaa, sünain wa'atapüin tia ka'ikat, watüjaa aa'ulu sünain shiimüin nüchooin waya Maleiwa, süka naapatüjülin chi Naa'inkai wamüin. ²⁴⁻²⁵ Je paala wekeroloiwa'aya sünain anoujaa süpüla wo'tte'ennünjanain nütüma Cristo, watüjaa aa'ulu sünain taashinjanain waya nütüma Maleiwa suulia ouktaa so'uweena wane ka'i. Müleka shiketjaajüle nümüin wane wayuu tü kasa na'atapajakat, nnojoiishi asukaakuu müinjachin süpüla. Alu'ujasa wayakana saa'u nnojoliyülin taashin waya, a'atapajeeshii waya waneepia.

²⁶⁻²⁷ Saa'u matsüin waa'in sünain tü wanoulakat, nükaaliijain waya chi Naa'inkai Maleiwa süma'inru'u wa'atapajüin tia ka'ikat. Nütüjaa aa'ulu chi Maleiwakai tü kee'ireekat waa'in. Je süka nnojolüin watüjaain saa'u tü wachuntajakat nümüin, nieechi achuntaka chi Naa'inkai süpüla saapünüin wamüin. Nüchunteerü shia chi Naa'inkai Maleiwa süka wane pütchi nnojotkat we'raajüin. Je niyaawatüin Maleiwa

saa'u süka nüchuntüin waneepia chi Naa'inkai tü kasa nüchekakat wapüleerua waya na nüchookkana.

Nnojotsü kasain asütüinjatüin waalii nüpüla Maleiwa

²⁸ Watüjaa aa'uchi chi Maleiwakai sünain nünaatüin waneepia süpüshua tü kasa alatakat namüin na wayuu aikana apüla nia, süpüla koo'omüinjatüin namüin sütsüin tü nanoulakat sütüma tü alatakat namüin, maa aka eekai mojuin otta eekai anain. Naya na nüneekakana süpüla tü kasa naa'inrüinjattüjütkaalia paala sümaiwa. ²⁹ Aneekajuushitüjülü'iyaa naya nütüma Maleiwa süpüla nüpüshinjanain. Akataluushitüjülü'iyaa naya nütüma süpüla müinjanain aka naya naa'in chi Nüchonkai, süpüla kojutüinjachin Jesucristo sütüma wayuu wainma saa'u nuwalayuuinapain naya.

³⁰ Neenaküin joo chi Maleiwakai na akataluushikana süpüla tü naa'inrüinjattüjütkaalia paala sümaiwa. Je nücheka achikit anajiraain naya nümaa süpüla eenjanain naya nümaa sünain anashaateenain ma'i no'ulu'u.

³¹ ¿Jamüinjatü wanüiki shi'ipajee tü pütchi anasükat? Ja'itairü wainmain tü wa'inüükalüürua saaliijee tü wanoulakat nünain Cristo, shiimüin wayamüleerüin shia, sükajee niain Maleiwa akaaliijüin waya. ³² Chi Maleiwakai, nnojoiishi na'alijirüin chi Nüchonche'echonkai ma'i. Nüjütüin nia wa'akamüin süpüla ouktaa saa'u waainjala. Süka naa'inrüin tia, watüjaa aa'uchi sünain naapeerüin wamüin süpüshua tü kasa anasükat.

³³Nnojotsü jaralüin “Kaainjaralii jia” müinjatüin wamüin waya aneequushikana nütüma Maleiwa, süka nümatüjülin chi Maleiwakai wamüin: “Talatirüitpa süpüshua tü jaainjalakat, je anajiraashii jia joolu'u tamaa”. ³⁴Nnojotsü jaralüin e'itaainjanain waya süpüla süsalaa waainjala sümaa wakatannüin nuulia Maleiwa. Jesucristo, nia chi aapajiraakai nikii süpüla ouktaa waa'ujee. Nia chi oso'iraakai aa'in süchikijee ouktaa. Nia chi laülaakai süpüla eenjachin nikialu'ujee Maleiwa sümaa nüchuntüin nümüin waa'u maa'ulu yaa. ³⁵Nnojotsü kasain oo'ule'ereechin Cristo suulia alin waya nüpüla. ¿Kaseerü asütaka waalii nüpüla? ¿Müliaa? ¿Mojuu akuaippa? ¿Müleka jashichire wayuu wamüin saaliijee tü wanoulakat? ¿Müleka aire jamü wamüin? ¿Müleka eere mojaa? ¿Müleka mmorule waya? ¿Müleka su'uteere waa'in wayuu? Nnojotsü kasain asütüinjatüin. ³⁶Aküjünüsü wachiki sütüma tü ashajuushikat sulu'u tü karaloukta nüchikimaajatkat Maleiwa, müsü mayaa:

“Jashichisü tü wa'ünüükalüirua wamüin shii'iree su'uteein waa'in
saa'ujee wanoujain nünain
Maleiwa.
Oukteeshii waya atümawaa,
maa aka saa'in anneerü eekai
ekiiraainjatüin”.

³⁷Müshi tachikua jümüin: Nnojotsü jaralüin oo'ule'erüinjachin Cristo suulia alin waya nüpüla. Ja'itairü wainmain tü wa'ünüükalüirua, shiimüin sünaain wayamüleerüin ütämüinre'eya, süka müichiain moo'ulaain Cristo suulia alin waya nüpüla.

³⁸⁻³⁹Müshi tachikua: Chi Maleiwakai, nnojoiishi na'alijirüin chi Nüchonkai, chi Wasenyotsekai Jesucristo. Nüjütüin nia wa'akamüin süpüla ouktaa waa'ujee. Sükajee tüü, tatüjaa aa'ulu sünaain nnojolüin kasain asütajatüin joo waalii nüpüla Maleiwa. Ja'itairü kasain alatüin wamüin kataiwa'aya wo'u, ja'itaina ouktüin waya, ayateena waya alin nüpüla. Ja'itakaja noo'ule'ereein chi Maleiwakai tü yolujaakalüirua oo'ulaka na aapiee chakana iipünaa suulia alin waya nüpüla, ayateena alin waya nüpüla. Ja'itakaja tü alatakat wamüin joolu'u je mapeena, ja'itakaja tü naa'inreekat na sülaülashiikana mma, ja'itakaja tü alatakat chaa sirumatu'upünaa je shiinalu'upünaa mmakat, ja'itakaja tü süchekakat wapüleerua süpüshua tü akumajuushikalüirua, nnojotsü suu'ule'erüinjachin chi Maleiwakai suulia alin waya nüpüla.

Nukuaippa chi Maleiwakai sünaain aneekaa wayuu

9 ¹Tü taküjainjatkat joolu'u jümüin, nnojotsü alawaain. Saa'u sa'aniraitpain takuaippa nümaa Cristo je saa'u jüüjüün taya nüümüin chi Naa'inkai Maleiwa, aküjüshi taya tü shiimüinkat waneepia, saa'in tamüin.
²⁻³Shiimüin sünaain mojushaatain ma'i taa'in waneepia naalii na tawalayuukana, na tapüshikanairua judfokana. Takaaliijeein naya sünaain anoujaa nünain Cristo, ja'tashije akatannüin taya naa'ujee nütüma chi Maleiwakai nuulia Cristo. ⁴Soto jaa'in tü kasa anasü aapünakat paala namüin. Naya Israelka anülia saa'u nuu'uliwo'uin naya chi watuushi Israelkai anülia. Naya e'itaanaka

süpüla nüchooinjanain Maleiwa. Nii'yatüin Maleiwa nukuaiippa namüin sünain anashaatain ma'i nia. Naya aapünaka amüin tü pütchi e'itaanakat paala nütüma Maleiwa. Naya aapünaka amüin süpüshua tü nüshajakat Moisés süpüla natüjaainjatüin saa'u tü nuluwataakat anain Maleiwa. Naya ekirajünaka nütüma Maleiwa sünain a'waajaa nia sulu'u tü a'waajüleekat chi Maleiwakai. Naya aküjünaka amüin süchiki tü kasa anasü naa'inrüinjatkat chi Maleiwakai sünain pansaain nüniiki namüin. ⁵Naya noo'uliwo'uka na wekii maalajanama'akana. Otta Cristo, nanainjeejachia ne'e, chi Wamaleiwasekai aluwataakai saa'u kasa süpüshua, chi wa'waajakai süpüla ka'ikat süpüshua. Amén.

⁶Tamüshii paala jia: Nayapaja'a na judíokana akataluushin nütüma Maleiwa süpüla nüchonwaa, ¿jamaka'a nayouktaka'a Cristo? ¿Shia cheje eera nnojotka pansaain tü nümakat paala Maleiwa namüin? Nnojo. Pansaasü nüniiki Maleiwa waneepia. Akatsa müin mayaa: Eesü wayuu na'aka na nuu'uliwo'ukana Israel eekai manoujüinyeein nüinain Cristo süka nnojolüin nüpüshin ma'i Maleiwa. ⁷Soto jaa'in chi wekii maalajachima'akai kanüliakai Abraham, chi aküjünakai amüin nütüma Maleiwa sünain müin mayaa: “Na nuu'uliwo'ukana chi püchonkai Isaac, nayeena ne'e namüiwa püchooinka ma'i?”. Eekalaka na'aka na nuu'uliwo'ukana Abraham wayuu eekai nnojolüin shiimüin nüpüshin Maleiwa. ⁸⁻⁹Müshi chi Maleiwakai paala nüümüin Abraham sümaa pansaain nüniiki nüümüin: “So'u wane

juyakaleena, keraajeerü tü tamakat paala pümüin sünain pansaain tanüiki. Jemeyuleerü Sara tü pu'wayuusekat nümaa wane püchon”, müshi nia nüümüin. Sükajee tüü, na nuu'uliwo'ukana Isaac chi nüchonkai Abraham sümaa Sara, nayainjana ne'e namüiwa nüpüshika ma'i Maleiwa. Otta na nuu'uliwo'ukana chi wane nüchonkai Abraham, chi jemeikai sümaa nnojolin nukajeejachin Maleiwa, nnojoliishii nüpüshin Maleiwa.

¹⁰Soto jaa'in nachiki na senkeyuu nüchooinkana chi watuushikai Isaac sümaa tü nu'wayuusekat kanüliakat Rebeca. Mayaainje nüchooin Isaac na piamashiikana tepichi, ¹¹⁻¹²aneekünüshi waneeshia nütüma Maleiwa, otta chi wane'e, maneekujusai. Nnojoliwa'aya neweetüin, nnojolüiwa'aya naa'inrüin kasa anasü otta kasa mojusü, “Laülaajeechi chi emülieekai naa'u chi epayaakai”, münüsü tü neikat nütüma Maleiwa. Shia süpüla sütüjaainjatüin wayuu naa'u chi Maleiwakai sünain nnojolüin nüneeküin wayuu sünainjee tü kasa anasü saa'inrakat. Sünainjeejatü tü kasa naa'inrüinjattüjütkaalia niakai paala sümaiwa. ¹³Müsü tü nümakat chi Maleiwakai noo'opünaa na senkeyuukana, tü ashajünakat paala: “Nia taneekaka Jacob, chi emülieekai. Otta Esaú, chi epayaakai, nnojoiishi kasajachin tamüin”.

¹⁴¿Jamüinjatü wanüiki shi'ipajee tüü? “Nnojotsü lotüin nukuaiippa Maleiwa maka'a nüneekajüin wayuu”, ¿müinjana waya? Nnojo. ¹⁵Soto jaa'in tü nümakat chi Maleiwakai nüümüin Moisés sünain müin mayaa:

“Eesü wayuu eekai tamüliajüün
sümaa tee'iyatüün ta'anasia
sümüün.

Je eesü eekai nnojolin
tamüliajüün sümaa nnojolin
tee'iyatüün ta'anasia
sümüün”.

¹⁶Je sükajee tüü, nnojoishi
aneekünüün wane wayuu nütüma chi
Maleiwakai sünainjee nücheküün chi
wayuukai aneekünaa. Je nnojoishi
aneekünüün sünainjee kasa anasü
naa'inrakat. Sükajeejatü nii'iyatüün
Maleiwa na'anasia nümüün.

¹⁷⁻¹⁸Wane wayuuirua, nii'iyatüün
na'anasia Maleiwa namüün
shii'iree nanoujain nünain. Otta
waneeirua, achechennüsü naa'in
nütüma Maleiwa suulia nanoujajüün
nünain. Ashajünüsü nüchiki wane
wayuu manoujüinyeesai nütüma
Maleiwa sulu'u tü karaloukta
nüchikimaajatkat chi Maleiwakai.
Müshi chi Maleiwakai nümüün
Faraón chi sülaülashikai tü
mmakat Egipto: “E'itaanüshi pia
tatüma sünain aluwatawaa, süpüla
tatüjaanüün aa'u sünain pülashin
taya sütüma tü taa'inrakat püka je
süpüla te'naajününjachin sütüma
wayuu sainküün mma”.

¹⁹Eesü süpüla süsouktüün wane
wayuu shi'ipajee tü tamakat,
sünain sümüün tamüün: “Müleka
sükaaliijünüleje nütüma Maleiwa
wane wayuuirua sünain anoujaa,
otta waneeirua, achechenna
aa'inrü nütüma suulia nanoujajüün,
çjamaka'a kasalajanainjatka'a
wamüün nütüma manoujain
waya? Isasü wachiki woo'ulaain
suulia tü nüchekakat wapüleerua”.
²⁰⁻²¹Tamüshi paala chi wayuukai:
Wayuu ne'e pia. çJamüsü
mojuka'aka püntüiki ni'ipajee

Maleiwa? Wane wayuu atükat,
müleka sücheküle süpüleerua
sütükeein wane irala iita eekai
anain ma'i, sütükain tia. Otta
müleka sütükeere ne'e wane amüchi
eekai mojuin, “çJamüsü maka'a
taya pütüma?” nnojotsü süpüla
sümüünjatüün sümüün tü wayuu
katükalakat.

²²Watüjaa aa'uchi chi Maleiwakai
sünain nii'iyateein nukuaippa
sümüün wayuu sünain jashichin
nia sümüün saalii saainjala je
sünain pülashin ma'i nia süpüla
süsalainjatüün shia nütüma. Süka
saja'ttinneerüün wayuu jashichikat
amüün chi Maleiwakai so'uweena
wane ka'i, çjamaka'a koulainka'a
shia nütüma süpüla süsalaa saainjala
maa'ulu yaa? ²³Shia süka nii'iyateein
nukuaippa sünain anashaatain ma'i
nia namüün na nüneekatüjülüikana.
Nümüliajüün naya süpüla eenjanain
nümaa waneepia chaa iipünaa.

²⁴Na wayuu aneekünatüjülüikana
nütüma Maleiwa süpüla nümüliajaa,
waya wayakana. Je eenakünüshii
waya nütüma süpüla anoujaa nünain,
maa aka sa'akajee tü judíokalüürua
oo'ulaka tü gentilekalüürua. ²⁵Tü
naa'inrakat chi Maleiwakai sünain
neenaküün na gentilekana, shia
tü nüshajakat achiki paala Oseas
sünain aküjaa tü nümakat Maleiwa,
sünain müin mayaa:

“Jia tapüshika'aya, meechi taya
sümüün wayuu eekai nnojolüün
tapüshipü'üün.

Je sümüün wayuu eekai
maaliipü'üün tapüla,
'Jia aishiika'aya tapüla', meechi
taya namüün”.

²⁶Shia tü aküünakat achiki sulu'u
wane ashajuushiya nütüma Oseas
sünain müin mayaa:

“Namüin na wayuu, ‘Nnojoliishii
jia tapüshin’,
nümapi’ükana amüin Maleiwa,
‘Naya nüchooinka Maleiwa
Matijainsaikai ouktaa’,
müneena so’uweena wane
ka’i”.

²⁷⁻²⁸Tü naa'inrakat chi Maleiwakai
sünain neenaküin na judíokana, shia
tü nüshajakat achiki paala Isafás
sünain müin mayaa:

“Alü’ütsü tü ka’i
kasalajanainjatkat o’u
nütüma Maleiwa namüin
naainjala napüshua na
kaainjaraliikana saa’u
mmakat.

Ja’itaina wainmain na
Israelkana, maa aka saa’in
jasai sotpünaa palaa,
o’tte’enneerü ne’e palirü
na’akajee”.

²⁹Shia tü aküjünakat achiki sulu’u
wane ashajuushiya nütüma Isafás,
sünain müin mayaa:

“Chi Maleiwa Pülashaatakai ma’i,
müleka nnojorule nüpüte’erüin
paala süpüshi naikeyuu na
watuushikana,
müshiije aka waya saa’in tü
pueulokolüirua Sodoma
oo’ulaka Gomorra
paala sümaiwa sünain
saja’ttale’einya”.

**Ayouktünüshi Cristo
natüma na Israelkana**

³⁰¿Jamüinjatü wanüiki
shi’ipajee tüü? Na gentilekana,
mayaainge nnojoliün kasajatüin
paala namüin anainjanain naya
no’ulu’u Maleiwa, anajiraainapa
naya nümaa sünainjee nanoujain
nünain Cristo. ³¹⁻³²Otta na wayuu
Israelkana, soo’opünaa kee’ireein

naa’in anain naya no’ulu’u Maleiwa
sünainjee aa’inraa tü nuluwataakat
anain Moisés, nnojotsü nountüin
anajirawaa nümaa Maleiwa, süka
nayouktüin tü anajirawaakat nümaa
sünainjeejatkat anoujaa nünain
Cristo. Nnojoliishii kamaneweein
nümüin chi ajütünakai nütüma
Maleiwa, chi o’tte’erüinjachikai
naya. ³³Tü nüchikikat Cristo, sünain
müin aka nia saa’in wane ipa eekai
shiyouktünüin sütüma wayuu,
ashajünüsü paala. Müsü mayaa:

“Te’itaajeerü wane ipa cha’aya
Jerusalén
mojeetkat atüma saa’in wayuu
süka süshanaajeerüin saa’ujee
süpüla amalajawaa.

Otta chi eekai nünoujain nünain,
talateerü ma’i naa’in nümaa”.

10 ¹Tawalayuwaa, kee’ireesü
ma’i taa’in shii’iree
no’tte’ennüin na tapüshikana
judíokanairua. Shia tachuntaka aa’u
waneepia nümüin Maleiwa. ²Tatüjaa
aa’uchii naya sünain na’yataweein
nümüin Maleiwa. Akatsa nnojoliün
lotüin nakuaippa sünain a’yatawaa
nümüin, ³saa’u nnojoliün noonooon
sümaa tü nümakat Maleiwa süpüla
anajiraainjanain naya nümaa.
Nnojotsü nayaawatüin saa’u tü
anajiraainjatkat akajee wayuu
nümaa. Je saa’u nayouktüin tü
nümakat Maleiwa, nachajaain
anajiraweein nümaa süka nakuaippa
namüiwa. ⁴Müshi taya tachikua
jümüin: Nnojoliishii anajiraain
waya nümaa Maleiwa sünainjee
woonooon sümaa tü nuluwataakat
anain Moisés. Süka shikeraajüitpain
nütüma Cristo tü nümakat Moisés,
anajiraashii nümaa Maleiwa
napüshua na eekai nanoujain nünain
Cristo.

⁵ Aküjüshi Moisés süchiki sukuaippa wayuu eekai anajiraweein nümaa Maleiwa, sünnain nüshajüin nüünüiki chi Maleiwakai mayaa: “Chi wayuu eekai kee'ireein naa'in kataa o'u tamaa chaa iipünaa, acheküshi noonoin waneepia sümaa tü taluwataakat anain”, müsü. ⁶⁻⁷ Otta saa'u shikeraajüitpain tü nuluwataakat anain Moisés nütüma Cristo, suuntuütpa wayuu anajirawaa nümaa Maleiwa sünnainjee sünnoujain ne'e nünnain Cristo. Nnojotsü che'ojaain wamüin wachuntüin nüümüin Cristo nüshakatüinjachin iipünaajee je nüso'iraain aa'in, süka naa'inratüjülü'inya tia.

⁸ Je tü nüchikikat chi O'tte'erüikai, aapünüsü wamüin süpüla waküjainjatüin shia je süpüla wanoujainjanain sünnain süka süpüshua waa'in. ⁹ Anuu tü shikirajakat anain tü nüchikikat chi O'tte'erüikai: Müleka waküjale süümüin wayuu nüchiki Jesucristo sünnain Wasenyotsein nia, sümaa wanoujain nünnain süka süpüshua waa'in sünnain süso'iraain naa'in nütüma Maleiwa süchikijee ouktaa, shiimüin sünnain wo'tte'ennüin.

¹⁰ Anajiraashii waya nümaa Maleiwa müleka wanoujüle nünnain Cristo süka süpüshua waa'in. Je atüjaaneena aa'u waya sünnain wo'tte'ennüin, süka waküjüin nüchiki Jesucristo sünnain Wasenyotsein nia. ¹¹ Je o'tte'ennüsü wayuu süpüshua eekai sünnoujain nünnain. Shia tü ashajünakat achiki sulu'u tü karaloukta nüchikimaajatkat Maleiwa, sünnain müin mayaa: “Wayuu süpüshua eekai sünnoujain nünnain, talateerü ma'i saa'in nümaa”. ¹²⁻¹³ Otta wane ashajuushiya, müstü yaa: “Chi wayuu

eekai nüchuntüin saa'u nünnülia chi Senyotkai Jesucristo, o'tte'enneechi nia”. Cristo, nia Nasenyotseka napüshua na eekai nanoujain nünnain, je anamiashaatashi nia süümüin wayuu süpüshua eekai süchuntüin nüümüin. Maa aka wayuu judío otta gentile, o'tte'ennüshii naya wanaawa sünnainjee tü naa'inrakat Cristo.

¹⁴⁻¹⁵ ¿Jamüsü nnojotka'a wainmain na judío eekai nachuntüin saa'u nünnülia Cristo süpüla no'tte'ennüinjanain? Anuu tü ashajünakat paala sünnain müin mayaa: “Anashaatasü ma'i süka süntüin wayuu wa'akamüin sünnain aküjaa wamüin süchiki kasa anasü”, müsü. Otta müleka nnojorule suluwataanüin wayuu sünnain aküjaa nüchiki Cristo, maküjainjeerü shia. Je müleka nnojorule süküjünüin nüchiki süümüin wayuu, nnojoleena naya atüjaain naa'u Cristo. Je wane wayuu, müleka nnojore nütüjaain naa'u Cristo, nnojoleerü nuuntüin anoujaa nünnain. Je müleka nnojorule nünnoujain nünnain Cristo, nnojoleerü nuuntüin achuntaa o'tte'ennaa nüümüin.

¹⁶⁻¹⁷ Müleka süküjünüle nüchiki Cristo, chi O'tte'erüikai, süümüin wayuu, shiimüin sünnain eejeerüin wayuu eekai sünnoujain nünnain süpüla su'tte'ennüinjatüin nütüma. Otta na Israelkana, ja'itaina naapüin nüchiki chi O'tte'erüikai, wainma eekai nnojolüin sünnoujain nünnain. Shia tü nüshajakat achiki paala Isafas sünnain müin mayaa: “Maleiwakalee, ¿jamüsü nnojotka'a nanoujain na wayuukana tü tekirajakat anain?”. ¹⁸ Taya Pablo, asakitshi paala taya: ¿Jamüsü nnojotka'a wainmain na anoujakana na'aka na Israelkana? ¿Shia süka

nnojoliin naapüin nüchiki chi O'tte'ertüikai? Nnojo. Shiimüin sünnain naapüin, maa aka tü ashajünakat paala. Müsü mayaa:

“Aküjünüsü nüchiki sainküin mmakat süpüshua.

Shiimüin sünnain saapünüin sitüma wayuu süpüshua”.

¹⁹Asakitshi taya tachikua: ¿Jamüsü nnojotka'a wainmain na anoujakana na'aka na Israelkana? ¿Shia süka nnojoliin nayaawatüin saa'u tü naapakat? Nnojo. Shiimüin sünnain nayaawatüin saa'u. Soto jaa'in tü nünüikikat Maleiwa ashajünakat paala nütüma Moisés sünnain müin mayaa:

“Jia wayuu Israelkana, achunjeerü jaa'in tatüma nachiiirua na gentilekana, na meirakaajukana amüin jütüma.

Jashicheena jia tatüma namüin na gentilekana, na nnojoliikana aapünüin amüin tü nüshajakat Moisés maa aka jiakana”.

²⁰Jashichishii naya, süka kamaneein chi Maleiwakai namüin na gentilekana. Nnojoishi mmoliin Isaías neema na Israelkana sünnain ashajaa tü nümakat Maleiwa noo'opünaa na gentilekana sünnain müin mayaa:

“Na wayuu nnojoliikana achajaain tachiki paala, antiinapa joolu'u tanain. Tee'iyatüitpa joo takuaippa namüin”.

²¹Otta nünüiki Maleiwa noo'opünaa na Israelkana, müsü mayaa:

“Ja'itairü kee'ireein taa'in anajiraweein naya tamaa, ayatshi'iya ayouktüin tanüiki.

Masütaajusalii naya sünnain moonooiin sümaa tü taluwataakat anain”.

Nükatalüin Maleiwa napüshi na Israelkana nünainmüin

11 ¹Asakitshi paala taya soo'opünaa tüü: Saa'u shiyouktünüin nünüiki Maleiwa natüma wainma na wayuu Israelkana, ¿niyüülajataapa Maleiwa na nüpüshikana? Nnojo. Nnojotsü shiain tia. Nnojoishi niyüülajüin tayakai, je shiimüin judfoin taya. Noo'uliwo'u taya na watuushikana Israel je Abraham. Je Benjamín te'iruku. ²Shiimüin sünnain nnojolin niyüülajüin Maleiwa na nüpüshikana, na nüneekatjülüikanaya paala sümaiwa. Soto jaa'in nüchiki Elías, tü ashajünakat sulu'u tü karaloukta nüchikimaajatkat Maleiwa. Müshi Elías nüümüin Maleiwa sünnain niyoujain na Israelkana: ³“Maleiwakalee, no'uta aa'inchii wainma na pünüikimaajanakana je nojunnajirüin tü a'ajüleekalüirua. Taya apütaaka ne'e tamüüwa sümaajaa no'uteein ma'i taa'inya”. ⁴Je nünüiki chi Maleiwakai ni'ipajee Elías: “Nnojoishi piain pümüüwa na'akajee na Israelkana sünnain oonooiin sümaa tanüiki. Takatalüin tanainmüin maa aka 7.000 wayuu na'akajee na wayuu Israelkana eekai ayatüin sünnain oonowaa sümaa tanüiki, eekai nnojoliin jüüjüüin nüümüin chi maleiwayaa kanüliakai Baal”, müsü. ⁵⁻⁶Müsia aka joo maa'ulu yaa. Eesü na'akajee na judfokana eekai nükatalüin chi Maleiwakai nünainmüin. Aneekünüshii

naya nütüma Maleiwa sünainjee anamiain nia namüin, nnojotsü sünainjeejatüin kasa anasü naa'inrakat. Müleka süneekünüleje wayuu sünainjee tü kasa anasü saa'inrakat, nnojotsüje che'ojaain anamiainjachin Maleiwa wamüin.

⁷Na'akajee na Israelkana, na eekai anajiraain nümaa Maleiwa, naya ne'e na aneekuushikana nütüma. Otta tü wane napüshikat, mayaainje kee'ireein saa'in anainjatüin shia no'ulu'u Maleiwa, nnojotsü suuntüin süka nüchecherüin Maleiwa saa'in suulia sünoujajüin nünain. ⁸Otta tü nachikikat, ashajünüsü paala, müsü mayaa:

“Je nayakana nütüma chi Maleiwakai, isasü nachiki nayaawatüinjatüin saa'u tü shiimüinkat.

Müshii aka wane mo'usai, otta wane mache'esai, nnojotsü nountüin nayaawatüin saa'u tü kasa ne'rakat je tü naapajakat achiki.

Ayatshi'iya naya sünain müin aka tia maa'ulu yaa”.

⁹⁻¹⁰Je tü nüshajalakat David nachiki, müsü mayaa:

“Kasataalejese nata'ünnüin nütüma Maleiwa wanaa sümaa nemi'ijaain kasalajanaiwa namüin tü naainjalakat.

Kasataalejese nnojoleerüin nayaawatüin saa'u tü shiimüinkat, süpüla müliainjatüin ma'i naa'in sütüma tü kasa mojusü alateekat namüin saaliijee naainjala”.

**Kamaneeshi Maleiwa
namüin na gentilekana**

***sükajee nayouktüin Cristo
na judíokana***

¹¹Asakitshi paala taya: Na wayuu Israelkana, saa'u ayatüin naya sünain ayouktaa nünüiki Maleiwa, çashanaashii naya sünain amüloulin sükajee tia? Nnojo. Nnojotsü shiain tia. Sükajee kaainjalain naya sünain nayouktüin Cristo, nükaalijain Maleiwa na gentilekana sünain o'tte'ennaa. Müleka nachunjale aa'in na judíokana nachiirua na gentilekana sünainjee tia, eesü süpüla kee'ireein naa'in o'tte'ennaa nayakanaya. ¹²Sükajee nayouktüin Cristo na judíokana, aküjünüsü nüchiki chi O'tte'erüikai namüin na gentilekana. Je talatüsü saa'in wayuu sainküin mma süka süküjünüin nüchiki Cristo sümüin wayuu ütamüinre'eya. Je alana'aleejeeria ma'i sünain talatüin saa'in so'uweena tia ka'ikat nanoujakat o'u wainma na judíokana sümaa no'tte'ennüinjanain.

¹³Aashajaashi taya joolu'u jümüin jia anoujashii gentilekana chakana Roma. Saa'u tayain wane chi Aluwataaushi aneekünakai nütüma Maleiwa süpüla taküjainjatüin nüchiki chi O'tte'erüikai sümüin wayuu eekai gentilein sainküin mmakat süpüshua, kojutsü tatüma tü ta'yataakat anain nümüin Maleiwa ja'aka. ¹⁴Otta süka nayain tapüshin na judíokana, tacheküin ma'i müleka nachunjale aa'in wainma nayakana jüchiirua jiakana gentilekana, süpüla nanoujainjanain nünain Cristo sümaa no'tte'ennüinjanainya. ¹⁵Sükajee nayouktüin na

judfókana nütüma Maleiwa saaliijee manoujain naya, suuntuin joo wayuu süpüshua anaawajirawaa nümaa Maleiwa. Je so'uweena tia ka'ikat kamaneeekat o'u chi Maleiwakai namüin na judfókana, talatashaateerü saa'in wayuu sainküin mma, süinain meerüin aka saa'in wane wayuu eekai süso'iraaipain naa'in wane suwala süchikijee ouktaa.

¹⁶Aneekünüshii na wayuu Israelkana nütüma Maleiwa sümaiwa paala süpüla nüpüshinjanain naya je süpüla nakatannüinjanain suulia kaainjalaa. Akaajaa jia gentilekana maa'ulu yaa, aneekünüshii jia nütüma Maleiwa süpüla nüchooinjanain jia je süpüla nükatallüinjanain jia suulia kaainjalaa. ¹⁷Müshii aka jia saa'in sütüna wunu'u sa'akajatü mojuui eekai shi'yotoonüin sümaa shi'itaanüin yaa miichipa'a süinain süsa'a wane wunu'u ekünaajuui achonlu süpüla kachoinjatüin tü sütünakat. Akaajaa na judfókana, müshii aka naya saa'in sütüna tü wunu'u ekünaajuuikat achon. Oshottünüsü süinainjee tü süsa'akat süpüla ji'itaanajanain jiakana shii'iraka. ¹⁸Jiakana gentilekana, jalia jia suulia a'waatawaa sulu'u jukuaippa noulia na judfókana. Soto jaa'in süinain nnojoliin jain süsa'ain tia wunu'ukot, sütüna ne'e jia. ¹⁹Eesü süpüla jümüin tamüin: "Oshottünüsü sütüna tü wunu'u ekünaajuuikat achon süpüla we'itaanajanain wayakana shii'iraka", müshii. ²⁰Mayaainje shiimüin tü jümakat, soto jaa'in wane kasa: Niyouktüin chi Maleiwakai na judfókana saaliijee manoujain naya, je jia gentilekana,

anaawajiraashii jia nümaa süinainjee tü jünoulakat. Je sükajee tüü, jalia jia suulia pülajüin jaa'in noulia na judfókana. Shia anaka alu'u mmorule jia neema Maleiwa. ²¹Saa'u niyouktüin Maleiwakai na judfókana saaliijee manoujain naya, shiimüin süinain niyoukteenain jia gentilekana müleka nnojorule jünoujain.

²²Nnojo motüin jaa'in süinain kamaneein ma'i jümüin chi Maleiwakai müleka nnojorule jiyouktüin tü na'anasiakat. Alu'ujasa müleka jiyouktüle nia, nuu'ulaajeena jia maa aka naa'inrakat paala naka na judfókana eekai kaainjalain. ²³Tü sütünakalüirua oshottünakat süinainjee tü wunu'u ekünaajuuikat achon, nnojotsü isain achiküü shi'itaanüin süchikua süinain tü süsa'akat. Meena na wayuu judfókana. Müleka nanoujale nachikua nüinain Maleiwa, nii'iyateerü na'anasia namüin nüchikua. ²⁴Tamüshii paala jia jüchikua: Tü sütünakat wunu'u sa'akajeejatkat mojuui, kapüleesü shi'itaanüin süinain süsa'a tü wunu'u miichipa'ajatkat ekünaajuuikat achon. Otta müsia tü sütünakalüirua oshottünakat paala süinainjee tü süsa'akat, mapüleesat shi'itaanüle süchikua süinainmüin.

Ojuittinneena na judfókana suulia kaainjalaa

²⁵Tawalayuwaa, suulia pülajüin jaa'in noulia na judfókana, anashi takjüüle joolu'u jümüin süchiki wane kasa matüjaajuukat aa'u paala: Na judfo achechennakana aa'in nütüma Maleiwa suulia nanoujajüin nüinain, ayateena naya manoujain wane'ere'eya keraapa jerainjatüin tü gentile anoujainjatkat nüinain Cristo.

26-27 Je süchikijee tia, ojuittinneena na judíokana wainma suulia kaainjalaa. Shia tü ashajünakat achiki paala süinain müin mayaa:

“Anteechi chi ojuittirüikai chajee Jerusalénjee nanainmüin na nuu'uliwo'ukana Jacob süpüla nükatälünjanain naya suulia tü mojusükot. Je so'u ka'ikat tia, ekettaajeerü tü pütchi jeket te'itaakat süpüla talatirüinjatüin naainjala noulia”.

28 Saa'u nayouktüin na judíokana tü nüchikikat chi O'tte'erüikai, nükaaliijain chi Maleiwakai na gentilekana süinain anoujaa nünain Cristo. Otta na judíokana, ja'itain nayan nü'ünüüin chi Maleiwakai maa'ulu yaa, ayatshi'iyaa alin naya nüpüla süka naneekünüin nütüma paala sümaiwa süpüla nayainjanain nüpüshin je süka pansaain nünuiki namüin na nekaa maalajanama'akana süinain nu'tte'erüinjanain naya. 29 Je watüjaa aa'uchi chi Maleiwakai, müleka nüneeküle wane wayuu süpüla naa'inrüinjatüin kasa anasü nüümüin, ayatsü pansaain waneepia nünuiki nüümüin. 30 Jiakana gentilekana, moonoolosalii paala jia sümaa nünuiki Maleiwa waneepia. Otta müsia joolu'u, nüümülijajünapa jia Maleiwa sükajee moonooon na judíokana.

31 Je maa aka nüümülijajünapain jia, nüümülijajeena na judíokana. Acheküshii amülijajünaa naya nütüma, süka nayouktüin tü nünuikikat. 32 Otta wayuu süpüshua, saaliijee shiyouktüin nünuiki Maleiwakai, ayüülajünüsü nütüma süpüla saa'inrüinjatüin tü mojusü kee'ireekat ma'i saa'in. Je acheküsü

amülijajünaa shia nütüma suulia amüloulüi.

A'waajaa Maleiwa

33 Anashii wa'waajüle chi Maleiwakai. Kekiishaatashi ma'inia. Nütüjaa aa'ulu kasa süpüshua. Nnojotsü wayaawatüin aa'u süpüshua tü kasa anasü naa'inrakat.

34 Shia tü ashajünakat achiki sümaiwa paala süinain müin mayaa: “Saa'u nnojolüin watüjaain saa'u tü jülüjakat naa'in chi Maleiwakai,

nnojotsü wountüin waküjain nüümüin tü naa'inrüinjatkat.

35 Nnojotsü kasain che'ojaain nüümüin süpüla wojuyaajirüin nia süpüla nuwalaajünjatüin süchikua wamüin”.

36 Nia kakumajalaka kasa süpüshua. Nia kataka atüma so'u kasa süpüshua süpüla kojutüinjachin nia süinainjee tü kasa anasü naainjakat. Joo'uya wa'waajaiwa nia süpüla ka'ikat süpüshua. Amén, anasü waa'inrüle tia.

Aapünüsü tü atüjaa wa'yataainjatkat aka nüümüin Maleiwa

12 1 Tawalayuwaa, süinainjee süpüshua tü anasü naa'inrakat chi Maleiwakai jaa'u süinain nüümülijajün jia, anakaja toso'irüle jaa'in shii'iree ju'waajünjachin nia süka süpüshua jaa'in. Saa'u jükatannünapain nütüma suulia jaainjala, jaapajiraa jümata jukuaippa nüümüin, süinain ji'yataain waneepia nüümüin kataiwa'aya jo'u süpüla talatüinjachin nia jümaa.

2 Alana'aleesia süinain anain tü nüchekakat Maleiwa wapüleerua

suulia kasa süpüshua, süka shiain tü talatakak atüma naa'in. Je sükajee tia, juu'ulaa suulia ashataa nakuaippa na manoujainsaliikana. Nnojo jülüjuün jaa'in maa aka tü jülüjakat naa'in nayakana. Müleka juu'ulaale suulia, nii'irateerü jukuaippa Maleiwa. Sünainjee tüü, juunteerü jiyaawatüin saa'u tü nüchekakat jüpüleerua, je kee'ireejeerü jaa'in jaa'inreein tia.

³Sünainjee na'anasia chi Maleiwakai aapünakat tamüin, tamüshii paala jia jüpüshua: Nnojo ju'waataain sulu'u jukuaippa. Shia anaka alu'u müleka jiyaawatüle naa'u Maleiwa sünain niain juuntüin atüma jaa'inrüin tü nüchekakat jüpüleerua. Anakaja müleka sotüle jaa'in che'ojaajeerüin waneepia akaaliijünaa jümüin nütüma Maleiwa süma'inru'u jiyataain nümüin. ⁴Jülüja jaa'in wakuaiippa sünain wainmain wa'ülia. Mayaainje ein wajapü oo'ulaka woo'ui, nnojotsü akatajiraain tiairua. Waneesia ne'e wakuaiippa. Maa aka wajapü, ja'ijaasü süpüla aa'inraa wane kasa. Akaajaa woo'ui, ja'ijaasü süpüla aa'inraa wane kasa'aya. ⁵Müsia wakuaiippa waya anoujashiikana wapüshua nünain Cristo. Ja'itaina wainmain wayakana, wayajiraashii sünain tü wanoulakat. A'aniraasü wakuaiippa nümaa Cristo süka niain wa'yataain amüin wane'ewaire wakua. ⁶Anakaja müleka wa'yataale nümüin Maleiwa süka tü atüjaa eitajünakat wamüin nütüma chi Naa'inkai Maleiwa. Naata'awaisü tü atüjaa aapünakat wamüin süpüla wa'yataain nümüin Maleiwa. Müleka saapünüle pümüin süpüla aapirülinjachin pia wayuu süka

nünüiki Maleiwa, anakaja püküjale waneepia tü shiimüinkat pünoujakat anain. ⁷Müleka saapünüle pümüin süpüla akaaliijülinjachin pia na puwalayuukana, puu'ulaka pümata tia. Müleka shiale süpüla ekirajülinjachin pia sulu'u tü outkajaaleekat, anasü paa'inrüle tia. ⁸Chi wayuu eekai naapünüin amüin süpüla achecherülinjachin nia saa'in wayuu sünain anoujaa, anashi müleka naa'inrüle tia. Chi eekai naapünüin amüin süpüla asülajülinjachin nia sümüin wayuu eekai maletsein, anashi nnojire jii'iyeyin nia suulia. Müleka shiale süpüla aluwataalinjachin pia wayuu, anakaja tütüle pia sünain aluwataawaa. Müleka shiale süpüla amüliajülinjachin pia wayuu, anashi müleka paa'inrüle tia sümaa talatüin paa'in.

Anaawaa sümaa wayuu waneepia

⁹Nnojo aiyaaain wayuu jüpüla, shiimüinjatü alin jüpüla. Jiyoukta tü mojusukat süpüleerua jaa'inrüinjatüin tü kasa anasükat. ¹⁰Anakaja müleka aijiraale jia jüpüla, süka pawalaawainapain jia. Nnojo yaletüin jukuaippa su'upala wayuu, shia jii'yata nojut napüshua na juwalayuukana. ¹¹Anakaja jiyataale nümüin chi Senyotkai süka süpüshua jaa'in sünain nnojoliin jukulajaaain. ¹²Müleka jirüle müliaa saaliijee tü jünoulakat, anasü jüchecherüle jaa'in su'utpünaa. Jüchunta waneepia nümüin Maleiwa, sümaa talatüin ma'ia jaa'in süma'inru'u ja'atapajüin tü naa'inrüinjatkat jümüin. ¹³Jüsülaja süpüshi tü juwashirüinkat namüin na juwalayuukana eekai maletsein. Je

müleka nantüle wane juwalayuu jünainmüün, anashii müleka kapürale jaa'in naya.

¹⁴Müleka ji'rüle müliaa süttüma wayuu sünnainjee tü jünoulakat, anakaja müleka jüchuntüle nüümüün Maleiwa süpüla ni'iyatüünjatüün na'anasia sümüün tia wayuukot, je nnojotsü süpüla kasalajanainjatüün sümüün nütüma. ¹⁵Müleka talatüle naa'in wane wayuu ja'aka, talata jaa'in wanaa nümaa. Je müleka mojule naa'in wane wayuu ja'aka, moju jaa'in wanaa nümaa. ¹⁶Nnojo ju'waataain sulu'u jukuaiippa sümaa pülayaain jaa'in suulia wayuu, shia jaa'inra akaaliijaa wayuu süpüshua sünnain nnojoliin kachekala'atain jia wayuu.

¹⁷Müleka mojulaale wane wayuu jümüün, anakaja müleka jirakaale nüka. Nnojo mojulaain jia ni'ipajee, shia jaa'inra tü anasükat su'upala wayuu süpüshua. ¹⁸Anakaja müleka kamaneere jia sümüün wayuu süpüshua suulia pa'ürülaawajirawaa. ¹⁹Müleka su'utünüle aa'in wane jüpüshi, nnojo kee'ireein jaa'in pasalaawaa. Shia anaka alu'u juu'ulaale chi uwomuyukai najapul'u Maleiwa süpüla niainjachin süsalaa atüma nia. Anuu tü nümakat chi Maleiwakai soo'opünaa tia, ashajünüsü paala sümaiwa sünnain müün mayaa:

“Süsalainjatü wayuu tatüma tayakai
süka tayain pasalaainjachin
atüma wayuu”.

²⁰Je wane ashajuushikalia, müsü mayaa:

“Müleka aire jamü sümüün wane jü'ünüü,
anakaja jikirüle shia.
Je münyaasüle nia,

anakaja jüsülaajüle wüün
nüsiün
süpüla japülinjachin nia
saaliijee tü mojustü
naa'inrakat jüka”.

²¹Jalia jia suulia shiyamülaa tü mojusükat. Shia anaka alu'u müleka jüyamürüle tü mojusükat süka tü anasü jaa'inrakat waneepia.

Kojutaa atüma na laülaayuushiikana

13 ¹Tekirajeena joo jia sünnain tü anasü jaa'inrüünjatkat shi'ipajee naluwataain na sülaülashiikana mma. E'itaaushi naya nütüma Maleiwa. Müleka nnojoliireje e'itaaushin naya nütüma, nnojoliishiije aluwataain. Je nücheküün chi Maleiwakai süpüleerua jüüjüünjatüün wayuu süpüshua namüün. ²Chi eekai niyouktüün aluwataanaa natüma, niyouktüünja'a mmata tü ni'inaajalakat chi Maleiwakai. Süsaleechi nia nütüma saaliijee tia. ³⁻⁴Shiimüün sünnain jashichin chi Maleiwakai namüün na wayuu aa'inrakana tü mojusükat. Ni'itaaain Maleiwa na sülaülashiikana mma süpüla kasalainjanainjatüün natüma naainjala na mojulaashiikana. Sükajee tia, mmoleena naya neema. Otta chi wayuu aa'inrakai tü anasükat, nnojoleechi mmolüün neema, süka nüchepchiaain Maleiwa naya süpüla akaaliijaa wayuu. Nnojoleere jiiimoliain naya, anakaja müleka lotüle jukuaiippa no'upala süpüla neirakaainjanain jüka. ⁵Tamüshii paala jia jüchikua: Anakaja jüüjüüle jia namüün na sülaülashiikana mma, süka nnojolüün süsaleein jia natüma, je süka jütüjaain saa'u sünnain shiain tü anasükat nu'upala Maleiwa.

⁶⁻⁷ A'yataashii na sülaülashiikana mma waneepia süna'in aluwatawaa. Oo'ulaka okotchajitshii neerü süpüla tü kasa che'ojaakat sulu'u tü mmakat. Anakaja nnojoliire ja'alijiraain suulia awalaajaa tia namüin, süka e'itaashin naya nütüma Maleiwa süpüla tia. Je anakaja müleka jii'iyatüle nojut namüin, süka nüchepchiain naya Maleiwa süpüla akaaliijaa wayuu je süpüla süsalaa atüma na mojulaashiikana.

**Aiwaa apüla wayuu süka
sülü'ülüin nükalia Cristo**

⁸ Watüjaa aa'ulu süna'in anain müleka pansaale tü wamakat süpüla wawalaajüin süchikua tü wajuyaalakat. Akaajaa jia, pansaa jütüma tü jümakat süpüla aijiraain jia jüpüla jüpüshua waneepia. Na wayuu aijiraakana napüla, nekeraajüin süpüshua tü nuluwataakat anain Moisés sükajee tia. ⁹ Müsü tü nuluwataakat anain Moisés: “Ai jüpüla wayuu süpüshua maa aka alin pia püpülaajiraa”, müsü. Müleka juu'ulaküle tia, nnojoleerü jaa'inrüin tü kasa achiajaanakat oulia waya nütüma süna'in müin mayaa: “Nnojo püma'üjaain sümaa wayuu nnojotkat pu'wayuusein otta nnojoiakai pu'wayuusein. Nnojo pu'utüin saa'in wayuu. Nnojo pu'luwajüin sükorolo wayuu. Nnojo kee'ireein paa'in naata kokoroloshi”, müsü. ¹⁰ Müleka aire wapüla wane wayuu, nnojoleena waya e'rülüin wayümüin nüümüin. Saa'u aijiraain waya wapüla wapüshua, wekeraajüin süpüshua tü nuluwataakat anain Moisés sükajee tia.

¹¹ Anakaja müleka aire jüpüla wayuu süpüshua, süka kettaaitpain sükalia süpüla eenjatüin ma'i waa'in süna'in süpüshua tü nüchekakat Maleiwa wapüleerua. Ai jüpüla wayuu süpüshua, süka sülü'ülüin nükalia chi Wasenyotsekai Jesucristo süna'in niitaain nüchikua süpüla nujuittirüinjanain waya suulia waa'injala. Pejereesia ma'i nükalia suulia paala wekeroloiwa'aya süna'in anoujaa nünain Cristo. ¹²⁻¹³ Saa'u sülü'ülüin nükalia Cristo, juu'ulaa suulia aa'inraa kasa mojusü, maa aka tü saa'inrakat wayuu sa'akapünaa piyuushi. Shia anaka alu'u müleka yapale jia süpüla eejirawaa sümaa tü mojusukat süna'inmüin aa'inraa tü anasukat. Nnojo maa'in jaa'in süna'in emi'ijaa. Nnojo jiperüin. Nnojo ju'luwajiraain jukuaippa sümaa wayuu jierü otta wane jierü nümaa wane toolo. Nnojo jüchunjain aa'in saa'u wayuu süna'in jü'ülüjaain. ¹⁴ Juu'ulaa suulia jüle'eru'uin süchiki kaainjalaa. Shia anaka alu'u müleka jüshatüle nukuaippa chi Senyotkai Jesucristo, süpüla nükaaliijainjanain jia süna'in ayamülaa tü mojusukat.

**Eewaa aa'in süna'in tü nünoujakat
anain wane wawala**

14 ¹ Ashajüshi taya jümüin joolu'u nachiki na anoujashiikana eekai nnojoliyülüin nayaawatüin ma'i saa'u sukuaippa tü anoujaakat. Anakaja müleka kamaneere jia namüin süna'in nnojoliin jü'ülüjaain namaa süna'injee tü nanoujakat anain, müleka lotüle shia, nnojottaale lotüin. ² Eesü süpüla nnojolüin mojuin jümüin ekaa eküülü eekai ein ne'e, süka anain tia no'ulu'u

Maleiwa jaajiin. Otta nümüin chi juwalakai mayaawatüinkai saa'u sukuaiippa tü anoujaakat, mojuushiü süpüla niküin asalaa, süka nnojolüin anain tia no'ulu'u Maleiwa naajiin.

³Nnojo pülain jaa'in nuulia chi puwala meküinkai asalaa. Je pialeje chi meküinkai asalaa, anakaja nnojoiere piyoujain chi puwalakai eekai niküin asalaa, süka kamaneein chi Maleiwakai wamüin waya anoujashiikana wapüshua.

⁴Tamüshii paala jia jüpüshua: Nnojotsü anain jiyoujain wane juwala, süka nüchepchiain Maleiwa waya wapüshua. Nia akaaliijaka waya süna'in atüjawaa saa'u tü waa'inrakat müleka anale shia, müleka mojule. Müleka waa'inrüle tü kasa mojustükat, kasalajaneerü wamüin nütüma. Otta wountüin waa'inrüin tü anasükat nütüma.

⁵Eeshii ja'aka eekai kojutüin atüma nakalia na judíokana, tü na'waajakat o'u Maleiwa. Otta wanee, nnojotsü kojutüin natüma. Tamüshii paala jia jüpüshua: Anakaja müleka jiyaawatüle saa'u tü jünoujakat anain. ⁶Chi kojutkai atüma nakalia na judíokana, kojutüshi Maleiwakai nütüma sükajee tia. Maa'aya aka chi meküinkai asalaa, kojutüshi Maleiwakai nütüma sükajee tia sümaa naapüin analu'ut nümüin. Maa'aya aka chi ekakai eekai een ne'e, kojutüshi Maleiwakai nütüma sükajee tia sümaa naapüin analu'ut nümüin. ⁷⁻⁸Tü waa'inrakat kataiwa'aya wo'u, nnojotsü süpülaajatüin talatüinjatüin ne'e waa'in, süpülaajatü kojutüinjachin watüma chi Maleiwakai. Nnojoleena wayain kojutka, nieechi chi Maleiwakai. Nüchooin

waya süna'injee tü naa'inrakat chi Wasenyotsekai Jesucristo. Ja'itakaje'e ouktapa waya, ayateena waya nüchooin.

⁹Watijaa aa'uchi Cristo süna'in ouktüin saa'u waainjala sümaa süso'iraain naa'in süpüla niainjachin Wasenyotsein. Nia Wasenyotseka joolu'u kataiwa'aya wo'u je ayateechia Wasenyotsein süchikijee ouktüin waya. ¹⁰Süka niain Wasenyotsein wapüshua, nnojotsü anain pülale jaa'in nuulia chi juwalakai, je nnojotsü anain jiyoujale nia. Niainjachi Maleiwa ayoujaka, süka washa'wale'enneenain wapüshua nümülatu'u so'uweena wane ka'i süpüla wasouktüinjanain nümüin saa'u tü waa'inrapü'ükat. ¹¹Shia tü nünüiki Maleiwa ashajünakat paala süna'in pansaain:

“ ‘Shiimüin süna'in piain Maleiwain’,
meerü tamüin tü wayuukolüirua süpüshua'aya süna'in süspainyo'ukain shia tamülatu'u”.

¹²Asouktinneena waya nümüin wane'ewa'ire wakua saa'u tü waa'inrapü'ükat kataiwa'aya wo'u, tü eekai anain, je tü eekai mojuin.

¹³Sükajee tüü, juu'ulaa suulia jiyoujain na juwalayukana. Anakaja müleka eere jaa'in süna'in süpüshua tü jaa'inrakat, suulia jaa'inrajiin wane kasa nujutuweetkat atüma wane juwala.

¹⁴Saa'u sa'aniraaitpain takuaippa nümaa chi Wasenyotsekai Jesucristo, tatüjaa aa'ut süna'in shiimüin nnojolüin yarüttüin waa'in süttüma wane kasa wekakat. Otta müleka mojuushiire nümüin wane juwala

ekaa wane eküülü, anakaja müleka nnojorule niküin shia. ¹⁵Je müleka mojule naa'in chi juwalakai saaliijee masütaajuin jia süna'in ekaa türa eküütakat, shiimüinj'a maalin nia jüpüla sükajee tia. Müleka niküle türa eküütakat jüchiirua, kaainjalashi nia saa'in nümüin sükajee tia, je amalajaweerü tü nünoulakat. Nnojo motüin jaa'in süna'in ouktüin Cristo naa'ujee niaka'iya. ¹⁶Müleka jütüjaale naa'u wane juwala süna'in mojeerüin naa'in saaliijee tü kasa jaa'inrüinjatkat, anakaja nnojorule jaa'inrüin shia. Ja'itairü nnojolüin mojuin shia saa'in jümüin, mojeerü nünüiki chi juwalakai jümüin müleka jaa'inrüle tia. ¹⁷¿Kasa nüchekaka chi Maleiwakai wapüleerua, waya eejeenakana nümaa süna'in aluwatawaa so'uweena wane ka'i? "Anakaja piküle tüü. Tüü, nnojotsü süpüla piküinjatüin", ¿münüshii waya nütüma Maleiwa? Nnojo. Naapüin chi Naa'inkai wamüin süpüla woonoojanain sümaa nünüiki waneepia, süpüla anainjatüin wakuaiippa nu'upala je süpüla talatüinjatüin ma'i waa'in nümaa. ¹⁸Otta jiakana, müleka kamaneere jia namüin na juwalayuukana wanaa sümaa ji'yataain nümüin Cristo, talateechi chi Maleiwakai jümaa je nnojoleerü mojuin sünüiki wayuu jümüin.

¹⁹Saa'u nüchooinapain waya Maleiwa, anakaja wakaaliijiraale suulia a'ülüjaajirawaa, süpüla katsüinjatüin waa'in wapüshua süna'in tü wanoulakat. ²⁰Jalia jia jümalaje'erajayaa tü naa'inrakat Maleiwa ja'aka. Watüjaa aa'ulu süna'in nnojolüin yarüttüin waa'in sütüma wane kasa wekakak. Otta

müleka kaainjarale wane wawala watüma süna'injee tü kasa wekakak, mojusü tü waa'inrakat sükajee tia. ²¹Müleka kaainjarale nia sütüma weküin asalaa, nnojotsü weküinjatüin shia. Müleka kaainjarale nia sütüma wasüin wiino, nnojotsü wasüinjatüin shia. Müleka kaainjarale nia sütüma wane kasa eekai eein, nnojotsü waa'inrüinjatüin shia.

²²Müleka anale saa'in jümüin tü jünoujakat anain soo'opünaa eküülü je soo'opünaa asüülü, anakaja müleka nnojoliire ju'waataain sulu'u tia. Jaashajaa süchiki nümaa Maleiwa nümüiwa. Je müleka jütüjaale saa'u tü nünoujakat anain wane juwala soo'opünaa eküülü je soo'opünaa asüülü, nnojo jaa'inrüin wane kasa mojakat atüma naa'in. Müleka jaa'inrüle tia, mojeerü nanüiki na juwalayuukana jümüin.

²³Je müleka nnojorule anain saa'in jümüin no'ulu'u Maleiwa jiküinjatüin wane eküülü, nnojo jiküin shia. Müleka jikülen, kasalajaneerü jümüin shia nütüma Maleiwa süka nnojolüin süna'injeejatüin shia tü jünoulakat. Nnojo motüin jaa'in tüü: Tü waa'inrakat, müleka nnojorule süna'injeejatüin tü wanoulakat, kaainjalaa tia.

15 ¹⁻²Wayakana ayaawatakana ma'i saa'u sukuaippa tü anoujaakat, anakaja müleka wakaaliijüle na wawalayuu nnojoiyülikana ayaawatüin ma'i saa'u tü anoujaakat. Nnojotsü anain müleka waa'inrüle tü wachekakat ne'e wamüiwa. Shia anaka alu'u müleka wakaaliijale na wawalayuukana sümaa wachecherüinjatüin naa'in süpüla katsüinjatüin tü nanoulakat.

³ Anakaja müle aka waya naa'in Cristo sünain nnojolüin naa'inrüin tü nüchekakat ne'e nümüiwa wanaa sümaa yaajachin nia mmolu'u. Naa'inrüin waneepia tü nüchekakat Maleiwa nüpüleerua. Shia tü ashajünakat nüchiki sünain müin mayaa: "Na wayuu e'rülüikana wayumüin nümüin Maleiwa, e'rülüi wayumüin tamüinya süka nanüiki", müsü.

⁴ Aamasü ma'i wamüin süpüshua tü pütchi ashajünakat paala sulu'u tü karaloukta nüchikimaajatkat Maleiwa süpüla wekirajaajiraain sünain. Müleka we'rüle müliaa, akaaliijünüshii waya sütüma tü pütchikat süpüla süchecherüinjatüin waa'in su'utpünaa tü müliaakat. Je müleka süshapajaale waa'in sünain wa'atapajüin tü naa'inrüinjateetkat chi Maleiwakai wamüin, katsüinsü waa'in sütüma tü pütchikat süma'inru'u wa'atapajüin.

⁵ Jia oushikajaakana süchiirua nukuaippa Cristo Jesús, tachuntüin nümüin chi Maleiwa achechetkai waa'in, katsüinkai atüma wanoula, süpüla paa'inwajiraainjanain jia nütüma, ⁶je süpüla wanaawainjatüin jaa'in nütüma sünain a'waajaa nia, chi Nüshikai chi Wasenyotsekai Jesucristo.

**Kamaneeshi chi Maleiwakai
namüin na gentilekana**

⁷ Maa aka kamaneein Cristo jümüin, anakaja kamaneejiraale jia süpüla nu'waajününjachin chi Maleiwakai sütüma wayuu süpüshua. ⁸ Nia a'waajünaka natüma na judókana, süka nüjütüin Jesucristo chi Nüchonkai nanainmüin süpüla natüjaainjachin naa'u sünain nikerajüin tü

nümükat paala namüin na natuushinuu maalajanama'akana sünain pansaain nüntüiki namüin sünain nüjütüinjachin Cristo na'akamüin so'uweena wane ka'i. ⁹ Je a'waajünüshi chi Maleiwakai natüma na gentilekanaya, süka nümüliajüinapain naya. Shia tü ashajünakat achiki paala sümaiwa sünain müin mayaa:

"Taapeerü pümüin analu'ut
na'akapünaa na wayuu
gentilekana.
Ee'irajeechi taya sünain
ta'waajüin pia no'upala".

¹⁰ Eesü wane ashajuushiya, müsü mayaa:

"Jiakana gentilekana,
anakaja jiajiraale namaa na
nüpüshikana Maleiwa
sünain ju'waajüin nia".

¹¹ Je wane ashajuushikalia sünain maa:

"Jiakana gentilekana jüpüshua,
anakaja ju'waajüle chi
Maleiwakai süka süpüshua
jaa'in".

¹² Je wane ashajuushikat nütüma Isaías, mataasia yaa:

"So'uweena wane ka'i, anteechi
wane nuu'uliwo'u Isaí, chi
nüshikai David.

Aneekünatüjülia nia
nütüma Maleiwa süpüla
nuluwataainjanain na
gentilekana.

Natüjaajeechi aa'u nia sünain
naa'inreerüin kasa anasü
namüin".

¹³ Je joolu'u, achuntüshi taya tachikua jaa'u jia anoujashiikana chakana Roma, süpüla nükaaliijainjanain jia chi Maleiwakai, achechetkai saa'in wayuu sünain anoujaa, sünain

talatüinjatüin jaa'in wanaa sümaa jiyataain nümüin, je süpüla naapüinjatüin wane anaa jümüin sükajee jünoujain nünain. Je süma'inru'u ja'atapajüin tü kasa anasü naa'inrüinjatkat jümüin, achechenneerü jaa'in waneepia sünain anoujaa nütüma chi Naa'inkai Maleiwa süka pülashin ma'i nia.

**Soo'opünaa tü ni'yataainkat
Pablo na'aka na gentilekana**

¹⁴Tawalayuwa chakana Roma, tatüjaa aa'uchii jia sünain wayuüin jia anashii, je sünain jiyaawatüin saa'u tü nüchekakat chi Maleiwakai jüpüleerua, je sünain juuntüin jikirajüin na juwalayuukana sünain tü shiimüinkat. ¹⁵Saa'u anamiain chi Maleiwakai tamüin je saa'u nüneeküin taya, nnojoiishi mmoluwain taya saa'u toso'irüin jaa'in sünain tü shiimüinkat süka tü tashajüitpakat jümüin.

¹⁶Aneekünüshi taya nütüma Maleiwa süpüla taküjainjatüin nüchiki chi O'tte'erüikai namüin na gentilekana. A'yataashi taya nümüin Cristo Jesús naa'ujee na gentilekana shii'iree talatüinjachin Maleiwa namaa nanoujapa nünain sümaa nakatannüin suulia naainjala nütüma chi Naa'inkai Maleiwa.

¹⁷Saa'u sa'aniraaipain takuaippa nümaa Cristo Jesús, a'waataashi taya sulu'u ta'yataain nümüin chi Maleiwakai, ¹⁸⁻¹⁹süka nükaaliijain taya Cristo sünain tü taa'inrakat na'aka na gentilekana sünain aküjaa nüchiki sümüin wayuu süpüshua chajee Jerusalénjee chamüinre'eya Ilíricomüin. O'ttüsü wainma wayuu sünain oonowaa sümaa nünüiki Maleiwa, süka ne'rüin tü kasa anasü

taa'inrakat no'upala, tü nütüjakat apüleerua Maleiwa nümüiwa. Tountüin taa'inrüin shia, süka pülashin ma'i chi Naa'inkai Maleiwa sünain nükaaliijain taya. ²⁰Keejiasü ma'i tamüin aküjaa nüchiki chi O'tte'erüikai sümüin wayuu eere matüjaajuuin naa'u Cristo. Nnojotsü keejiajin tamüin a'yatawaa eere ni'yataaichin wane aküjai. ²¹Anuu tü ashajünakat paala nüchiki Cristo, müsü mayaa:

“Aküjüneerü nüchiki sümüin wayuu eekai nnojolüin sükujúünün amüin paala süpüla sütüjaainjachin naa'u”.

**Aküjüshi Pablo süchiki
o'unaa Romamüin**

²²⁻²⁴Otta jiakana Romaje'ewaliikana, wainmairü ma'i juya shii'iree te'reein ma'i jia. Isapü'üsü tachiki o'unaa jünainmüin, süka wainmain ta'yataain sünain aküjaa nüchiki Cristo sainküin mmakat süpüshua. Alu'ujasa joolu'u, süka kettaaitpain ta'yataain sulu'u tü mmakat eere taya maa'ulu yaa, yapashi taya süpüla to'unüin jünainmüin. Sünain to'unajachin Españamüin, jii'youpünaajeechi taya palit ka'i. Kaaliijeechi taya jütüma süpüla to'unüin chajee jüma'anajee chamüin Españamüin.

²⁵Otta palajana, o'üneechi taya Jerusalénmüin süpüla takaaliijüinjanain na wawalayuu judío müliakana jamü. ²⁶Na anoujashii gentilekana chakana sulu'u tü mmakat Macedonia oo'ulaka yaa sulu'u tü mmakat Acaya, asülajüshii naya süpüshi tü nawashirüinkat süpüla nakaaliijainjanain na wawalayuu chakana Jerusalén. Shia to'unajaika

apüla Jerusalénmüin alü'tijaa tü nasülajüinkat. ²⁷Talatüsü naa'in na gentilekana sünnain astilajaa. Anasü saa'in tamüin tü naa'inrakat sünnain nasülajüin namüin na judíokana tü che'ojaakat namüin maa'ulu yaa, süka saapünüin namüin na gentilekana na'anasia Maleiwa naapakat paala namüin na judíokana.

²⁸Süchikijee taapüin tü asülajünakat namüin na judíokana, o'üneechi taya chamüin Españamüin sünnain ji'iyoupünaainjachin taya cha'aya Roma. ²⁹Achüntüshi taya wainmatua nümüin Cristo jaa'u, shii'iree naapüin jümüin wainma tü kasa anasü iipünaajeejatkat. Je joolu'u sünnain to'unüinjachin jünainmüin, tatüjaa aa'ulu sünnain shikeraajünjatüin süpüshua tü tachuntakat apüla.

³⁰Saa'u jünoujain nünain chi Wasenyotsekai Jesucristo wanaa tamaa, je saa'u aijiraain waya wapüla süka een chi Naa'inkai Maleiwa wamaa, anakaja waneepiale jia sünnain achuntaa taa'u nümüin chi Maleiwakai. ³¹Jüchunta nümüin taa'u süpüla talatüinjatüin naa'in na anoujashii chakana Jerusalén sümaa tü taa'inrüinjatkat cha'aya. Je jüchunta nümüin süpüla taa'inmajünüin nütüma noulia na manoujainsaliikana chakana sulu'u tü mmakat Judea.

³²Müleka nücheküle tapüleerua chi Maleiwakai, anteechi taya ja'akamüin sünnain ji'iyounjachin taya. Talateerü ma'i taa'in süka eenjachin taya jümaa. ³³Otta tayakai, tachüntüin nümüin Maleiwa aapakai wane anaa wamüin, süpüla eenjachin nia jümaa waneepia. Amén, tawalayuwaa.

Aluwate'etshii nanüiki süpüla asakaa na nawalayuwakana

16 ¹Tü wawalakat Febe anteetkat jünainmüin, yalayalasü shia saa'in tamüin sünnain shi'yataain sulu'u tü outkajaaleekat yaaya Cencrea. ²Jia nüpüshikana Maleiwa, anakaja kamaneere jia sümüin, süka jiajiraain sümaa sünnain jünoujain nünain chi Senyotkai. Jükaaliija shia sünnain tü ja'ljaakat sümüin, süka sükaaliijapü'üin tayakai oo'ulaka wayuu wainma.

³Tasakeein joolu'u na tawalayuu chakana ja'aka.

Tasaküin Priscila nümaa Aquila a'yataaliikana tamaa paalainka yaaya sünnain aküjaa nüchiki Cristo Jesús. ⁴Soo'opünaa no'utüneein aa'in, ayatshi'iya nakaaliijain taya. Sükajee tüü, tayakai namaa na anoujashii gentilekana sulu'u tü outkajaaleekat süpüshua, waapüin analu'tu namüin.

⁵Tasaküin tü anoujasü juktatsükalüürua cha nepialu'u.

Je tasaküin Epeneto chi tatünajutkai, chi palajachikai sünnain anoujaa nünain Cristo yaa sulu'u tü mmakat Acaya.

⁶Tasaküin joolu'u María, wane wayuu tütüsü sünnain a'yatawaa ja'aka.

⁷Tasaküin joo Andrónico sümaa Junias na tapüshi judíokana püreesapü'ükana wanaa tamaa. Ekerotshii palajana tapüleerua sünnain anoujaa nünain Cristo, je kojutshii naya natüma na Aluwataaushikana.

⁸Tasaküin joolu'u Amplias chi tatünajutkai aishikai tapüla sulu'u anoujaa nünain chi Senyotkai.

⁹Tasaküin Urbano chi a'yataaikai nümüin Cristo wanaa wamaa, oo'ulaka Estaquis chi tatünajutkai.

¹⁰Tasaküin Apeles chi anakai ma'i sünnain sa'aniraain nukuaippa nümaa Cristo, süka naa'inrüin waneepia tü aluwataanakat anain.

Tasaküin napüshua na nüpüshikanairua Aristóbulo.

¹¹Tasaküin Herodión chi judíokai wanaa tamaa.

Je tasaküin Narciso oo'ulaka na anoujashii chakana nipialu'u.

¹²Tasaküin Trifena sümaa Trifosa oo'ulaka Pérsida kojutkat ma'i tatüma. Tütüshii ma'i naya sünnain a'yatawaa nümüin chi Senyotkai.

¹³Tasaküin Rufo sümaa tü niikat. Yalalayashi ma'i nia sünnain ni'yataain nümüin chi Senyotkai. Je tü niikat, müsü aka shia saa'in wane tei, süka saa'inmajapü'üin taya.

¹⁴Tasaküin Asíncrito, Flegonte, Hermas, Patrobas, Hermes je wawalayuu eekai jutkatüin namaa.

¹⁵Tasaküin Filólogo, Julia, je Nereo sümaa tü nüshunuukat, oo'ulaka Olimpas namaa napüshua na anoujashiikana eekai jutkatüin cha'aya namaa.

¹⁶Anakaja jüsakiraale jüpüshua süka aijiraa'in jia jüpüla sünnainjee anoujaa nünain Cristo. Je na anoujashiikana napüshua sulu'u tü outkajaaleekalüirua yaaya, nasaküin jia jüpüshua.

¹⁷Tawalayuwaa, jalia jia noulia na wayuu ekirajakana sünnain kasa naata, na wayuu oo'ule'etkana jia suulia paa'inwajirawaa je nekirajüin jia sünnain kasa mojusü. Nnojo ju'unüin nanainmüin sünnain aapajaa nanüiki. ¹⁸Tü pütchi nalü'üjakat achiki jümüin, nnojoleerü kasain saamüin süpüla jiyataainjanain

nümüin chi Wasenyotsekai Jesucristo. Ekirajüshii naya shii'iree washireein ne'e. Je chi wayuu eekai jekechin sünnain anoujaa nünain Cristo, nünoujeerü tü alawaakat aküjünakat nümüin, süka anain ma'i shia sünnain keme'eriain.

¹⁹Talatashaatasü ma'i taa'in, süka jinnajünüin sünnain joonoo'in sümaa nünuiki Maleiwa. Anakaja kekiire jia süpüla jütüjaainjatüin saa'u tü kasa jaa'inrakat, müleka anale, müleka mojule, süpüla jiyouktüinjatüin tü kasa mojusükat sünnain jaa'inrüin tü anasükat waneepia.

²⁰Achuntüshi joolu'u taya jaa'u nümüin chi Wasenyotsekai Jesús süpüla nii'iyatüin na'anasia jümüin. Je chi Maleiwa aapakai wane anaa jümüin, ayamüleechi Satanás nütüma süpüla malainjachin nia süpüla ja'atajawaa.

²¹Nüsaküin jia Timoteo chi a'yanaajiraakai tamaa nümüin chi Senyotkai. Nasaküin jia Lucio, Jasón, oo'ulaka Sosípater, na tapüshi judíokana.

²²Oo'ulaka Tercio, chi ashajüikai tü karalouktakat tanüikimaajatkat aluwataanakat jümüin, nüsaküin jiakanaya süka nünoujain nünain Cristo wanaa jümaa.

²³Nüsaküin jia Gayo, chi kamaneekei wamüin wayakana anoujashiikana wapüshua ni'iyoule waya. Nasaküin jia Erasto, chi aa'inmajüikai sünnaitse tü pueulokot, oo'ulaka chi wawalakai Cuarto.

²⁴Anasü nii'iyatale Cristo na'anasia jümüin. Amén.

²⁵Anakaja ju'waajüle chi Maleiwakai katsüinkai atüma tü jünoulakat sünnainjee nüchiki Jesucristo, chi O'tte'erüikai,

taküjakat jümüin. Ja'itairü
 nnojolüin ayaawatünüin aa'u tü
 nüchikikat sütüma wayuu sümaiwa
 paala, ²⁶ee'iyatünüitpa joolu'u
 wamüin. Akaaliijünüshii waya
 süinain ayaawataa saa'u sükajee tü
 nashajakat na nüüikimaajanakana
 Maleiwa. Je aluwataanüshii
 waya nütüma chi Maleiwakai
 matüjainkai ouktaa süpüla aküjaa
 nüchiki chi O'tte'erüikai sümüin
 wayuu sainküin mmakat süpüshua

süpüla nanoujainjanain nüinain
 je süpüla naa'inrüinjatüin tü
 nuluwataakat anain. ²⁷Anakaja
 joolu'u wa'waajüle wapüshua chi
 Maleiwakai waneeshikai süinain
 Maleiwain, chi kekiikai ma'i
 süinain süpüshua tü naa'inrakat.
 Anakaja kojutule nia watüma
 süpüla ka'ikat süpüshua süinainjee
 tü miyo'ukat ma'i naa'inrakat
 Jesucristo. Amén, joo'uya
 waa'inraiwa tia.